

Ala xa Masenyi Kiitisaе бє Masenyi nde yi Kitaabui xa fe ra

Annabi Munsa to Isirayila pama ramini Misira бoxi ra, Annabi Yosuwe naxa e xanin Kanaan. Alatala nu bara saate tongo Annabi Iburahima бє, a Isirayila бonsоee fama na бoxi sоtode, a findi e gbe ra. Na birin naxa raba alo Ala a masen ki naxe, Annabi Yosuwe fa laaxira. Na taruxui birin sebexi kitaabui kui naxan xili «Ala xa Masenyi Annabi Yosuwe бє.»

Na dangi xanbi, Isirayila die naxa sabati Kanaan бoxi ma, Ala dennaxe fi e ma. Kono e nu bara mixi naxee kerі naa, nee man naxa Isirayila gere folo. Alatala yati naxa a lu e xa na raba, barima Isirayila nu na gbilenfe Ala xui foxo ra. Na toore to Isirayila li, e naxa ratu Alatala xa seriye ma, e fa bira a foxo ra alo a lan ki naxe. Na kui, Ala fan naxa e mali alako e xa no e yaxuie ra. A nu na rabama mixi seniyenxie nan saabui ra naxee findi Isirayila «kiitisaе» ra. Na birin sebexi kitaabui kui naxan xili «Ala xa Masenyi Kiitisaе бє.»

Na taruxui lonni xungbe masenma won бє. Xa won gbilen Alatala foxo ra, a fe fanyi naxan fixi won ma, a nee bama ne won yi ra, won fa tooro a jaaxi ra. Kono Ala mu tinma won xa lu na toore mooli kui, barima a won xanuxi. Xa won bara won ma yunubi kolon, won fa na masen Ala бє, won a mayandi a xa dije, a mu tondima.

Ala bɔŋe fan, a sɛnbe gbo. Xa a sa a li won bara tɔɔre soto won ma yunubi saabui ra, Ala wama won malife alako won xa gbilen a xa kira ma. Won Marigi mu tinma won xa lɔe, a fe birin nabama won be alako won xa lu seniyenyi kui sɛwe sɔtɔma dennaxe.

Ala xa won mali won ma dunijeigiri kui. Amina.

Ala xa Masenyi Kiitisae be

Isirayila Kanaan bɔxi sɔtɔfe

¹ Yosuwe faxa xanbi, Isirayilakae naxa Alatala maxɔrin, «Nde singe kelima muxu ya ma tefe ra Kanaankae gere?»

² Alatala naxa e yaabi, «Yuda bɔnsɔe nan tema. N bara bɔxi sa e sagoe.»

³ Yuda bɔnsɔe naxa a fala e ngaxakerenyi Simeyɔnkae be, «Won birin xa siga e dennaxe soxi muxu yi ra, won xa sa Kanaankae gere. Na dangi xanbi, won birin nan sigama e dennaxe soxi wo tan fan yi ra.» Simeyɔn bɔnsɔe naxa tin na ra.

⁴ Yudayakae to te, Alatala naxa Kanaankae nun Perisikae sa e sagoe. E naxa xeme wulu fu faxa Beseki.

⁵ Na kui e naxa Kanaankae nun Perisikae bɔnbɔ. E to Beseki mange li naa, e naxa na fan gere.

⁶ A naxa a gi, kɔnɔ e naxa bira a fɔxɔ ra han e naxa a suxu, e fa a belexekurae nun a sankurae mabolon.

⁷ Adoni Beseki naxa a fala, «Temui dangixi, n tan bara mange tongo solofere suxu, n e

bēlexekurae nun e sankurae bolon. E naxa e dēge donse ra naxan nu birama n dēgede. Yakōsi Ala na na sare ragbilenfe n ma.» E naxa a xanin Darisalamu, a naxa faxa mēnni.

⁸ Yuda bōnsōe naxa Darisalamu gere. E to a suxu, e naxa mēnnikae sōntō santidēgema ra, e taa gan.

⁹ Na dangi xanbi, e man naxa goro Kanaankae gere, naxee nu sabatixi Isirayila geyae fari, Negewi gbengberenyi nun Sefela bōxi mabiri.

¹⁰ Yuda bōnsōe naxa siga Kanaankae gere, naxee nu sabatixi Hebron, dennaxe xili nu falama singe ra nu Kiriyati Ariba. E naxa Sēsayi, Aximan, nun Talama bōnbō.

¹¹ E naxa keli mēnni sigafe ra Debirikae gere, dennaxe xili nu falama singe ra nu Kiriyati Sifa.

¹² Kalebi naxa a masen, «Mixi naxan Kiriyati Sifa masōtoma n bē, n nan ma di ginē Akasa fima nē na kanyi ma, a findi a xa ginē ra.»

¹³ Kenasi xa di xeme Otiniyeli, Kalebi xunya nan na masōtō. Kalebi fa a xa di ginē Akasa fi a ma.

¹⁴ Lōxōe nde Akasa naxa a fala Otiniyeli bē, a xa a bitanyi mayandi a xa xē nde fi a ma. Akasa to goro a xa sofale fari, Kalebi naxa a maxōrin, «I wama munse xōn?»

¹⁵ A naxa a yaabi, «N wama nē i xa fe fanyi nde raba n bē. I bara bōxi nde so n yi ra yirefanyi ma. I xa ye dula nde fan fi n ma.» Kalebi naxa tin na ra, a fa ye dula ndee fi a ma. Keren nu na fuge, boore nu na labe.

¹⁶ Annabi Munsa bitanyi Kenika xa die naxa keli Yeriko, taa naxan xili «Tugi taa,» e nun Yuda bōnsōe. E naxa siga sabatide gbengberenyi

Yudaya boxi ma, Negewi Aradi yirefanyi ma. E naxa sabati nama tagi.

¹⁷ Yudayakae nun e ngaxakerenyi Simeyɔnkae naxa siga Kanaankae gereḁe, naxee nu sabatixi Sefati. E naxa na taa ratɔn. Na nan a toxi a xili falama Horoma.

¹⁸ E man naxa Gasa, Asikalɔn, nun Ekiron masɔɔ, a nun e xa boxie.

¹⁹ Alatala nun Yuda bɔnsɔɔ nan nu a ra. E naxa Isirayila geyae masɔɔ, kɔnɔ e mu nɔ mixie ra naxee nu sabatixi lanbanyi ma, barima sɔori ragisee wure daaxi nan nu na e yi ra.

²⁰ E naxa Hebron so Kalebi yi ra, alo Annabi Munsa a fala ki naxe. Kalebi naxa Anaki xa di saxanyie kerɔ naa.

²¹ Bunyamin xa die mu nɔ Yebusukae keride, naxee nu sabatixi Darisalamu. Han to Yebusukae sabatixi Darisalamu Bunyamin bɔnsɔɔ ya ma.

²² Yusufu bɔnsɔɔ naxa Beteli gere. E nun Alatala nan birin nu a ra.

²³ E naxa mixi xee Beteli, e xa menni mato. Yi taa xili nu falama ne singe ra nu Lusi.

²⁴ Na xerae naxa xeme nde to, a na minife taa kui. E naxa a fala a be, «Taa sode masen muxu be. Muxu fan fe fanyi rabama ne i be na temui.»

²⁵ A to taa sode masen e be, e naxa mennikae faxa santidegema ra, kɔnɔ e naxa yi xeme nun a xa denbaya lu na.

²⁶ Yi xeme naxa siga Xitikae xa boxi ma, a naxa taa ti, a Lusi xili sa a xun. Han to na xili nan falama na xun.

²⁷ Kɔnɔ Manasi bɔnsɔɔ mu nɔ Beti Saan, Taanaki, Dorɔ, Yibeleyami, Megido, nun e xa

boxie masotode. Kanaankae mu tin kelide na boxi ma.

²⁸ Isirayila to senbe soto a fanyi ra, e naxa Kanaankae findi e xa konyie ra, kono e mu e keru.

²⁹ Efirami bonsoe fan mu no Kanaankae keride naxee nu sabatixi Geseri. Kanaankae naxa lu naa Eframikae ya ma.

³⁰ Sabulon bonsoe fan mu no Kanaankae keride naxee nu sabatixi Kitiron nun Nahaloli. Kanaankae naxa lu naa Sabulonkae ya ma, kono Isirayilakae naxa e findi e xa konyie ra.

³¹ Aseri bonsoe fan mu no Ako, Sidon, Axalabi, Akisibu, Xeleba, Afeki, nun Rexobo masotode.

³² Na nan a toxi Aserikae naxa sabati Kanaankae tagi na boxi ma.

³³ Nafatali bonsoe fan mu no Beti Semesi nun Beti Anati masotode. Nafatalikae naxa sabati Kanaankae tagi na boxi ma. Beti Semesikae nun Beti Anatikae naxa findi e xa konyie ra.

³⁴ Dana bonsoe fan mu no Amorikae keride Isirayila geya bunyie. Na nan a toxi Danakae naxa sabati geyae fari.

³⁵ Amorikae naxa wa lufe Xeresse geya, Ayalon, nun Saalabimi, kono Yusufu bonsoe naxa senbe soto, e Amorikae findi e xa konyie ra.

³⁶ Amorikae xa naaninyi nu foloxi Akarabimi, a siga han Sela.

2

Isirayila Alatala xa saate kanafe

¹ Alatala xa maleke naxa keli Giligali, a siga Bokin. A naxa a masen Isirayilakae be, «N bara wo tongo Misira, n fa wo xun ti boxi ra, n dennaxe saate tongo marakali ra wo benbae

be. N nu bara a fala, <N mu n ma saate kanama abadan.>

² A mu lan wo tan xa saate tongo yi boxi mixie be. A nu lan ne wo xa e xa serexebadee rabira, kono wo mu n ma yaamari suxu! Wo yi wali mooli rabaxi munfe ra?

³ Na nan a toxi, n xa a fala wo be, n mu fama e keride wo ya ra. E fama lude wo seeti ma ne. E xa alae findima gantanyi nan na wo be.»

⁴ Alatala xa maleke to ge yi woyenyi masende Isirayilakae be, e naxa wa e xui itexi ra.

⁵ E naxa Bokin xili fala yi yire xun, e fa serexee ba Alatala be.

Yosuwe xa faxe

⁶ Yosuwe to nama bejin, Isirayilakae naxa siga e xa boxi masotode naxan nu findixi e ke ra.

⁷ Nama naxa Alatala xa seriye suxu Yosuwe xa waxati kui, nun forie xa waxati kui, naxee xa simaya dangi Yosuwe ra, naxee nu bara Alatala xa kaabanakoe to, a naxee rabaxi Isirayila be.

⁸ Nunu xa di Yosuwe, Alatala xa konyi, naxa laaxira a xa simaya je keme je fu ma.

⁹ E naxa a ragata a xa boxi ma naxan findi a ke ra, Timinati Xereεe, Eframi geya yire, Gaasi geya koola biri.

¹⁰ Yosuwe xunlanmae birin to faxes, mixi gbeteεe naxa mini naxee mu Alatala kolon. E mu a kolon a nu bara naxan naba Isirayila be.

¹¹ Na temui Isirayilakae naxa fe raba naxan mu rafan Alatala ma. E naxa tuubi Bali kuyee be.

¹² E naxa Alatala finsiriwali, e benbae Marigi Alatala, naxan e ramini Misira boxi ma. E naxa bira ala gbeteεe foxo ra, e rabilinyi mixie nu ala

naxee batufe, e nu fa e felen nee be. E naxa Alatala rapaaxu,

¹³ e a finsiriwali, e Bali kuyee nun Asitarate kuyee batu.

¹⁴ Alatala naxa xonon Isirayila ma, a naxa e sa e wuru mixie belexe. A naxa e sara e yaxuie ma e rabilinyi. E mu fa non tide e yaxuie ya ra sonon.

¹⁵ E nu sigama gere sode dennaxe birin, Alatala nan nu e bonboma, a nu fe paaxi donon e ma, alo a nu bara a masen e be ki naxe marakali ra. E naxa tonon ki fanyi.

¹⁶ Alatala naxa kiitisae rakeli, e xa e ratanga e wuru mixie ma.

¹⁷ Konon Isirayilakae mu tin e tuli matide na kiitisae ra, barima e nu wama ala gbete nan batufe, e xa e felen e be. E naxa gbilen e benbae xa kira fonon ra mafuren. E benbae nu bara bira Alatala xa seriye fonon ra, konon e tan mu tin na ra feo.

¹⁸ Alatala to nu kiitisamae rakelima, a naxa e mali e xa simaya birin kui alako Isirayilakae xa ratanga e yaxuie ma. Alatala nu kinikinima e ma e xa tonon birin kui.

¹⁹ Konon kiitisa to bara faxa, e man naxa bira ala gbete fonon ra dangife e babae ra. E naxa e batu, e felen bonon ma e be. E mu sese ba e xa wali kobie ra, e bonon xononon tun.

²⁰ Na kui Alatala bonon naxa te Isirayilakae xili ma, a fa a masen, «Yi pama bara e kobe ti n ma saate ra n naxan tongo e benbae be. E bara n xui matandi.

²¹ Na kui, n tan fan mu fama si keren keride e ya ra sonon, naxee nu na yi bonon ma Yosuwe faxa temui naxe.

²² N fama Isirayilakae matode xa e tinma, xa e mu tinma, birade Alatala xa kira foxo ra alo e benbae a raba ki naxe.»

²³ Alatala naxa yi sie lu naa, a mu naxee saxi Yosuwe sagoe. A mu gbata e keride sonon.

3

Ala Isirayilakae matofe

¹ Alatala naxa yi sie lu Kanaan boxi ma alako e xa Isirayilakae mato, naxee mu nu na gere singee kolon.

² Na rabaxi ne alako Isirayila lanfanmae xa na gere xa fe kolon, naxee mu nu a kolonxi nu.

³ Si naxee lu Kanaan boxi ma, nee nan yi ki: Filisitakae xa mange suuli, Kanaankae birin, Sidonkae, nun Hiwikae naxee nu sabatixi Liban geyae fari, kelife Bali Xerimon geya ma, a sa doxo Xamata sode de ra.

⁴ Yi sie lu ne naa alako Alatala xa Isirayilakae mato, a xa a kolon xa e sa birama a xa seriye foxo ra, a naxan sebe e babae be Annabi Munsa saabui ra.

⁵ Isirayilakae naxa sabati Kanaankae, Xitikae, Amorikae, Perisikae, Hiwikae, nun Yebusukae tagi.

⁶ Isirayilakae naxa mennikae xa di ginne doxo, e fan naxa e xa di ginne fi mennikae xa di xemee ma. Isirayilakae man naxa e xa alae batu.

Kiitisa mixi fu nun firin

Otiniyeli, Isirayila kiitisa

⁷ Isirayilakae naxa fe jaaxi raba naxan mu rafan Alatala ma. E naxa neemu Alatala ma,

e Marigi Ala, e fa Bali kuyee nun Aseri wuri masolixi batu.

⁸ Alatala naxa xɔnɔ Isirayila ma, a fa e sa Kusan Risatayimi sago, Mesopotamiya mange, Isirayilakae nu na naxan xa yaamari bun ma jɛ solomasaxan.

⁹ Isirayilakae to Alatala xili e xui itexi ra, a naxa marakisima ramini e bɛ, Kenasi xa di Otiniyeli, Kalebi xunya.

¹⁰ Alatala Xaxili naxa goro a ma. A naxa findi Isirayila kiitisa ra. A to siga gere sode, Alatala naxa Mesopotamiya mange, Kusan Risatayimi, sa a sago senbɛ ra.

¹¹ Bɔxi naxa lu bɔɓɛsa kui jɛ tongo naani. Na temui Kenasi xa di Otiniyeli naxa faxa.

Exudu, Isirayila kiitisa

¹² Isirayilakae man naxa fe jaaxi raba naxan mu rafan Alatala ma. Na nan a toxi, Alatala naxa senbɛ so Mowaba mange Egilon yi ra Isirayila xili ma, naxan nu bara fe jaaxi raba Alatala ya i.

¹³ Egilon naxa Amonikae nun Amalekikae xili, e birin xa Isirayila gere. Na kui e naxa Tugi taa masoto.

¹⁴ Isirayilakae naxa lu Mowaba mange Egilon xa yaamari bun ma jɛ fu nun solomasaxan.

¹⁵ Isirayilakae to Alatala xili e xui itexi ra, a naxa marakisima ramini e bɛ, Gera Bunyaminka xa di Exudu, naxan nu walima a kɔɔla bɛlexɛ ra. Isirayilakae naxa a xɛɛ, a xa duuti xanin Mowaba mange Egilon xɔn.

¹⁶ Exudu naxa santidegema dɛ firin yailan, naxan xa kuyɛ nɔngɔn ya keren lima, a fa a nɔxun a xa donma bun ma a yirefanyi tabe fari.

17 A naxa duuti fi Mowaba mangε Egilon ma, naxan fate xungbo a gbe ra.

18 A to γε duuti fide, a naxa xεmεε ragbilen naxee nu bara na kote xanin.

19 Exudu to kuyee li naxee nu na Giligali, a naxa gbilen Egilon yire, a fa a fala, «Mangε, n wama gundo nde falafe i bε.» Mangε naxa a fala booree bε, «Wo wo magbilen sinden.» Naxee birin nu na a sεeti ma, e naxa e magbilen.

20 Exudu naxa a maso Egilon na, naxan nu dɔxɔxi a xa konkoe itexi xinbelixi kui, dennaxε nu yailanxi a keren peti bε. Exudu naxa a fala a bε, «Ala bara n xεε, n xa yi masenyi fala i bε.» Egilon naxa keli a xa dɔxɔse kui.

21 Na tεmui Exudu naxa a xa santidegema ba a tεε i a kɔola belexε ra a yirefanyi sεeti, a Egilon furi sɔxɔ a ra.

22 A kole nun a fε birin naxa so a furi, a mini a fari. Ture naxa raxi a xun ma, barima a bara santidegema lu naa.

23 Exudu to mini konkoe kui, a naxa naade balan a xun ma saabi ra.

24 Na dangi xanbi, mangε xa konyie naxa fa. E naxa a to konkoe itexi naade balanxi. E nu fa a fala, «A na fe nde nan xun ma banxi xinbelixi kui.»

25 E naxa mame ti han, kɔnɔ mangε to mu nu konkoe itexi naade rabima, e naxa saabi tongo, e na rabi. E naxa e xa mangε to bɔxi ma, a bara faxes.

26 E nu mame tife tεmui naxε, Exudu nu bara a gi. A naxa dangi kuyee yire ra, a sa a yetε ratanga Seyira biri.

²⁷ A fefe so, a naxa feri fe. Isirayilakae naxee nu na Efirmi geyae fari, e naxa goro, e naxa ti a xanbi ra.

²⁸ A naxa a fala e be, «Wo bira n foxo ra, barima Alatala bara wo yaxui Mowabakae sa wo sagoe.» E naxa bira a foxo ra, e siga, e sa ti Yuruden xure de Mowaba biri ra. E mu tin mixi gbete xa xure igiri menni.

²⁹ Na waxati bun ma, e naxa Mowabaka xeme gbangbalanyi mixi wulu fu faxa. Mixi yo mu no a gide e ya ma.

³⁰ Na loxo Isirayilakae naxa Mowabakae rayaagi. Boxi naxa lu bonesa kui ne tongo solomasaxan.

Samagari, Isirayila kiitisa

³¹ Na to dangi, Anati xa di Samagari naxa findi kiitisa ra. A naxa Filisitaka xeme mixi keme senni faxa ninge rapere wuri ra. Na kui a fan naxa Isirayila ratanga.

4

Debora, Isirayila kiitisa

¹ Isirayilakae man naxa fe jaaxi raba naxan mu rafan Alatala ma. Exudu nu bara faxa na temui.

² Alatala fan naxa e sa Yabini sagoe, Kanaan mangende, naxan nu na Xasori. Sisera, a xa soorie xunyi, nu sabatixi Xaroseti Goyimi.

³ Isirayilakae naxa Alatala xili e xui itexi ra, barima soori ragise wure daaxi keme solomanaani nan nu na Yabini yi ra. A naxa Isirayilakae tooo a jaaxi ra ne moxooren bun ma.

4 Na waxati kui, Debora namijonme gine, Lapidoti xa gine, nan nu kiitisa ra Isirayila boxi ma.

5 A nu kiiti sama tugi bunyi ne, naxan xili «Debora xa tugi,» Raama nun Beteli tagi, Eframi geyae ma. Isirayilakae nu sigama a yire, a xa e xa kiiti sa.

6 Debora naxa Kedesika Abinowami xa di Baraki xili, naxan nu na Nafatali bɔnsɔe xa boxi ma, a fa a fala a be, «Isirayila Marigi Alatala yi yaamari nan soxi i yi ra. I xa Nafatalikae nun Sabulonkaе xeme wulu fu xanin Taboro geya fari.

7 N fama Sisera, Yabini xa soori mange, bendunde i ma Kison xure mabiri. N a xa soori birin nun e ragisee sama ne i sago.»

8 Baraki naxa a fala a be, «Xa won birin nan a ra, n sigama, kɔnɔ xa won birin mu a ra, n mu sigama feo.»

9 Debora naxa a yaabi, «Na kui, won birin nan sigama, kɔnɔ i mu fama matɔxɔe yo sotode na kui, barima Alatala fama Sisera sade gine nde nan sagoe.» Na temui, Debora nun Baraki naxa siga Kedesi.

10 Baraki naxa Nafatalikae nun Sabulonkaе maxili Kedesi. Xeme mixi wulu fu naxa bira a foxɔ ra. Debora fan nu na e ya ma.

11 Heberi Kenika nu bara gbilen a bɔnsɔe foxɔ ra, naxan findi Xobabo xa die ra, Annabi Munsa bitanyi xemema. Heberi nu bara a xa kiri banxi ti Saanimi, wuri belebele nde bun, Kedesi fe ma.

12 Mixi nde to a fala Sisera be, a Abinowami xa di Baraki bara te Taboro geya fari,

¹³ a naxa a xa soori birin nun a xa soori ragise keme solomanaani xun lan Kison xure, kelifе Xaroseti Goyimi.

¹⁴ Na temui Debora naxa a fala Baraki be, «Keli, to Alatala fama Sisera sade i sagoe. Alatala nan tima i ya ra.» Baraki naxa goro Taboro geya fari, xeme mixi wulu fu biraxi a foxo ra.

¹⁵ Alatala naxa Sisera nun a xa soori birin nagi Baraki xa santidegema xepenxi ya ra. Sisera naxa goro a xa soori ragise kui, a a gi a sanyi ra.

¹⁶ Baraki naxa Sisera xa geresoe kerі han Xaroseti Goyimi, e xa soori ragisee kui. Baraki xa soorie naxa e birin faxa santidegema ra, mixi keren mu lu.

¹⁷ Sisera naxa a gi a sanyi ra, a sa a noxun Yayeli xa kiri banxi kui, Heberi Kenika xa gine. A na rabaxi ne barima lanyi nu na Xasori mange Yabini nun Heberi Kenika xabile tagi.

¹⁸ Yayeli naxa mini Sisera ya ra, a fa a fala a be, «N marigi, fa be, i noxun n xonyi, hali i mu gaaxu.» A naxa sa a noxun Yayeli xa kiri banxi kui sade dugi bun ma.

¹⁹ Sisera naxa a fala Yayeli be, «N bara i maxandi, n ki ye ra, n xa a min. Ye xoli na n ma.» Yayeli naxa xipe sase de rabi, a a so a yi. Sisera to a min, Yayeli naxa gbilen a makoto ra.

²⁰ A man naxa a fala Yayeli be, «Ti kiri banxi sode de ra. Xa mixi nde fa sa i maxorin a falafe ra, <Mixi nde mu soxi be?>, i xa na kanyi yaabi, <Ade.>»

²¹ Heberi xa gine Yayeli naxa kiri banxi mabanban wuri nde tongo, derema suxuxi a yi. Xi xoli nu bara ge Sisera node taganyi saabui ra. A naxa

a makore Sisera ra doyin, a fa na wuri banban a gbegebe xonyi ma han a soti boxi. Sisera naxa faxa keren na.

²² Yayeli naxa mini Baraki ya ra, naxan nu na birafe Sisera foxo ra. A naxa a fala a be, «Fa be, i xeme naxan fenfe, n xa a masen i be.» Baraki naxa so Yayeli xonyi, a fa Sisera faxaxi to, wuri banbanxi a gbegebe xonyi.

²³ Na loxo Alatala naxa Kanaan boxi mange Yabini rayaagi Isirayilakae ya xori.

²⁴ Isirayilakae belexe sa Kanaan mange Yabini ma na ki ne a xuri xuri ra, han e naxa a faxa.

5

Deboraxa beeti

¹ Na loxo, Abinowami xa di Baraki nun Debora naxa yi beeti ba:

² «Alatala tantu!
Isirayila senbema bara keli.

Nama fan bara tin na gere ra.

³ Mangae, mangedia, wo wo tuli mati a fanyi ra.
N tan beeti bama ne, n a bama Alatala nan be.
N xa Isirayila Marigi Alatala binya beeti ra.

⁴ Alatala, i to keli Seyiri, Edonkae xa boxi ma,
boxi naxa seren,
koore nuxui naxa tune ragoro.

⁵ Geyae naxa xoyo Alatala ya i,
yi Turusinina geya fan naxa seren Isirayila
Marigi Alatala ya i.

⁶ Yayeli nun Anati xa di Samagari waxati,
mixi mu nu noma biyaaside mupetie xa fe ra.

⁷ Isirayilakae mu nu noma lude daaxae sonon,
e birin naxa keli naa,

han n tan Debora minixi temui naxe.
N bara findi Isirayila nga ra.

⁸ E nu bara ala nɛɛnɛ batu folo.
Gere nu bara fa han taa naadɛ ra,
soori makantase nun tanbe yo mu nu na Isirayi-
laka mixi wulu tongo naani yi ra.»

⁹ «Alatala tantu!
N boɲɛ na Isirayila mangɛɛ nun pama foɲo ra,
naxee e yetɛ panigexi.

¹⁰ Wo tan naxee tema sofale gine fiixɛɛ fari,
wo tan naxee doɲoma dugi fanyi fari,
wo tan naxee jɛɛɛma kira ra, wo wo mapoɲun.

¹¹ Naxee ye bama kolonyi ra,
e Alatala tantuma a xa fe fanyie ma.
Alatala fe fanyi raba nɛ Isirayila be,
a xa pama tixi taa sode de ra temui naxe.»

¹² «Debora, xunu!
Xunu, i xa beɛti ba.
Abinowami xa di Baraki, keli!
I xa yaxuie xanin.

¹³ Alatala naxa xunnakeli fi a xa pama fanyi ma,
a naxa n xun nakeli senbɛmae tagi.

¹⁴ Eframikae naxa fa,
naxee kelixi Amalekikae xa boɲi ma,
Bunyaminkae naxa bira e foɲo ra.
Makiri mangɛɛ fan naxa goro,
a nun Sabulon yareratɛ.

¹⁵ Isakari mangɛɛ naxa lu Debora seɛti ma.
E naxa Baraki mali,
e goro geya bunyi,
koɲo Rubenkae tan naxa woɲɛn han.

¹⁶ Wo luxi wo xa xurusee tagi munfe ra,

wo nu fa wo tuli mati e wa xui ra?
 Rubenkae tan fo woyenyi nontare.

17 Galadikae fan naxa lu Yuruden naakiri ma.
 Danakae lu e xa kunkuie fe ma munfe ra?
 Aserikae fan naxa lu wafu ra, baa de.

18 Sabulonkae tan naxa ti faxe ya i.
 Nafatalikae fan naxa suusa gere ra.»

19 «Mangee naxa fa.

Kanaan mangee naxa fa gere sode Taanaki,
 Megido xure de ra,
 konɔ e mu harige nun gbeti yo soto na kui.

20 Koore naxa gere so,
 tunbuie naxa Sisera gere.

21 Kison xure fori naxa e xanin.
 N boɲe xa senbe so,
 n xa siga yare!

22 Na temui, soorie naxa e xa soe ragi.
 E naxa e xulun, e gbataxi.

23 Alatala xa maleke naxa a fala,
 <Wo xa Merosi danka.
 Wo xa Merosikae birin danka.
 E mu nu biraxi Alatala foxo ra senbemaie tagi.»

24 «Yayeli barakatɔe ginɛ nan a ra,
 Heberi Kenika xa ginɛ.

Barakatɔe belebele nan a ra ginɛe tagi,
 naxee sabatixi kiri banxi kui.

25 Sisera to ye makula, a naxa xipe fi a ma.
 A naxa xipe fanyi so a yi ra pɔɔti tofanyi kui.

26 Kiri banxi mabanban wuri suxuxi a yi,
 derema fan na a yirefanyi belexe.
 A naxa a banban Sisera xunyi,
 a xunyi naxa boɔ.

27 Sisera xa fe naxa dan Yayeli bun ma,
a saxi bɔxi, a naxa faxa.
Sisera xa fe naxa dan Yayeli bun ma,
a saxi bɔxi, a naxa faxa.»

28 «Sisera nga tixi wunderi ra,
a a falama, <Munfe ra a ragise mu nu fa sinden?
Munfe ra a sɔori ragisee buxi fade?>

29 A xa lonnilae naxa a yaabi yi wɔyɛnyi ra,

30 <Temunde e mu na e harige see xa tongofe?

E mu na nee xa itaxunfe?

Ginɛ keren sɔori keren,

xa na mu a ra sɔori keren, ginɛ firin.

E e wasaso se maɲingixie ra naxee nu rafan

Sisera ma,

e e wasaso donma maɲingi dinxie ra.

Donma maɲingixi keren, donma dinxi firin,

xunnakeli kanyi xa na soto.>

31 Alatala, i yaxuie birin xa halaki na ki nɛ,

kɔnɔ i xanuntenyie xa yanba alo soge itexi.»

Na dangi xanbi, bɔxi naxa lu xaxilisa kui jɛ
tongo naani.

6

Gedeyon findife kiitisa ra

¹ Isirayilakae man naxa fe kobi raba Alatala ya
i naxan mu rafan a ma. A naxa e sa Madiyankae
xa nɔɛ bun ma han jɛ solofere.

² Madiyankae naxa fe xɔrɔxɔɛɛ dɔxɔ Isirayila
ma. Na nan a to, Isirayilakae naxa folee ge geya
fari, e yetɛ makantadee yailan gɛmɛ longori ra.

³ Isirayilakae na xε sa tεmui naxe, Madiyankae, Amalekikae, nun bɔnsɔε gbεtεε naxee kelima sogegorode, nee nu tema nε, e ti e kanke.

⁴ E nu lu e fε ma e xa Isirayilakae xa daxamui birin kana han Gasa. E mu nu sese luma Isirayila, hali bɔxi daxamuie, γεχεεε, ningee, xa na mu a ra sofalee.

⁵ Na mixie nu tema tεmui naxe, nun e xa xurusee ra, kiri banxie, nun γɔχɔmεε, e nu luma nε alɔ katoe gali naxan kasare rabama bɔxi ma.

⁶ Madiyankae to Isirayila findi setare bɔxi ra, Isirayilakae naxa Alatala maxandi.

⁷ E to Alatala makula Madiyankae xa fe ra,

⁸ Alatala naxa namipɔnmε keren xεε e ma. A naxa a fala e bε, «Isirayila Marigi Alatala xa masenyi nan yi ki, <N bara wo ramini Misira bɔxi ma, wo nu na konyiya kui dennaxe.

⁹ N bara wo ba Misirakae belexε, a nun wo yaxui birin. N bara e keri wo ya ra, n fa e xa bɔxi fi wo ma.

¹⁰ N bara a masen wo bε, «N tan nan na Alatala ra, wo Marigi Ala. Wo naxa gaaxu Amorikae xa alae ya ra, wo sabatixi bɔxi naxee ma.» Kɔnɔ wo mu biraxi n xui fɔχɔ ra.»»

¹¹ Alatala xa malekε naxa so Ofara daaxa kui, a naxa dɔχɔ wuri bili bun ma, naxan tixi Yowasi xɔnyi, naxan nu na Abiyesa bɔnsɔε ya ma. Yowasi xa di Gedeyon nu na mengi bɔnbɔfe yili kui weni bogi nu bunduma dennaxe, alako a xa a nɔχun Madiyankae ma.

¹² Alatala xa malekε naxa mini a ma, a fa a fala a bε, «I tan geresoe fanyi, wo nun Alatala birin nan a ra.»

13 Gedeyon naxa a fala a be, «N Marigi, xa muxu nun Alatala birin nan a ra, yi fe xoxoxe birin fa muxu lixi munfe ra? A xa kaabanakoe na minden? Muxu babae bara kaabanako nde madoxo muxu be. E naxe, «Alatala nan muxu ramini Misira ra.» Yakosi Alatala bara won nabepin, a won sa Madiyankae sago.»

14 Alatala naxa a masen a be, «I senbe so. I fama ne Isirayila ratangade Madiyankae belexe. N tan xa mu i xexi?»

15 A naxa a yaabi, «N Marigi, n tan noma Isirayila ratangade a yaxuie ma? N xabile xa setarepa dangi xabile birin gbe ra Manasi bonsoe ya ma. N baba xa di donxoe na n tan nan na.»

16 Alatala naxa a masen a be, «Kono won birin nan a ra. Na kui i fama Madiyankae birin bonbode alo i na mixi keren nan bonbofe.»

17 Gedeyon naxa a yaabi, «Xa i bara hinne n na, tonxuma nde masen n be, naxan a masenma i tan yati nan woyenxi n be.

18 Yandi, i naxa i makuya be ra, beemanu n xa fa n ma serexe ra i be.» Alatala naxa a fala, «N luma be han i fama temui naxe.»

19 Gedeyon naxa siga, a sa si yore keren faxa, a farin busali keren nafala taami lebinitare ra. A naxa sube sa debe kui, a naxa bore sa bore sase kui, a naxa e dentegge Alatala be wuri bili bun ma.

20 Alatala xa maleke naxa a masen a be, «Sube nun taami lebinitare tongo, i xa e sa yi geme fari, i bore sa a ma.» Gedeyon to ge na rabade,

21 Alatala xa maleke naxa a yisuxuwuri itala, a naxa a din sube nun taami lebinitare ra. Na kui te naxa dexe geme ma, a sube nun taami

лєbinitare birin gan. Na xanbi Alatala xa malekє naxa лє a ma.

²² Gedeyon to a to Alatala xa malekє yati nan a ra, a naxa a fala, «N Marigi Alatala! N bara Alatala xa malekє to, a tixi n ya i.»

²³ Alatala naxa a masen a бє, «Hali i mu gaaxu, i mu faxama. I бɔɔє xa sa.»

²⁴ Gedeyon naxa sєrєxєbade yailan Alatala бє mєnni, a fa a xili fala na xun, «Alatala xa бɔɔєsa.» Han to, mєnni na Ofara, Abiyesa xabile na dennaxє.

²⁵ Na лɔxɔє kɔє ra Alatala naxa a masen Gedeyon бє, «I baba xa tuura tongo, naxan bara ɲє solofere sɔtɔ. I xa i baba xa Bali kuye sєrєxєbade kana, a nun na Aseri wuri masolixi, naxan tixi a xun.

²⁶ Na dangi xanbi, i xa sєrєxєbade gbєtє yailan i Marigi Alatala бє yi yire magaaxuxi fari. I xa na tuura ba sєrєxє gan daaxi ra. Na Aseri wuri masolixi, i naxan kanama, na xa findi yege ra na sєrєxє ganse ra.»

²⁷ Gedeyon naxa mixi fu tongo a xa konyie ya ma, a na birin naba, Alatala naxan masenxi a бє. A na raba kɔє nan na, barima a nu gaaxuxi a baba xa mixie nun taakae ya ra.

²⁸ Taakae to keli subaxє ma, e naxa a to Bali kuye sєrєxєbade rabiraxi, Aseri wuri masolixi naxan nu tixi a xun ma, na fan nabiraxi. E man naxa tuura to naxan baxi sєrєxє gan daaxi ra sєrєxєbade nєnє fari.

²⁹ E naxa e boore maxɔrin, «Nde yi rabaxi?» E to na fe fen, e fa a fala e boore бє, «Yowasi xa di Gedeyon nan fɔxi a ra.»

³⁰ Na kui taakae naxa a fala Yowasi бe, «I xa di ramini, a xa faxa, barima a bara Bali kuye serexebade kana, a man bara Aseri wuri masolixi rabira, naxan nu tixi a xun.»

³¹ Yowasi naxa mixie yaabi, naxee nu tixi a kanke, «Wo tan nan Bali xun mafalama? Wo tan nan a ratangama? Mixi yo naxan Bali xun mafala, na kanyi nan singe faxama beemanu kuye xa iba. Xa Ala nan na Bali ra, a tan xa a yete xun mafala, barima e a tan nan xa serexebade rabiraxi.»

³² Na loxoe, e naxa Yerubaali xili fala Gedeyon xun ma, e nu fa a fala, «Bali xa a yete xun mafala, barima a bara a xa serexebade rabira.»

³³ Madiyankae, Amalekikae, nun bõnsõe gbete naxee keli sogetede, nee naxa e malan, e fa Yuruden igiri, e lu Yisireeli geya bunyi.

³⁴ Alatala Xaxili naxa lu Gedeyon бe. A naxa feri fe, a xa Abiyeseri bõnsõe maxili alako e birin xa bira a foxo ra.

³⁵ A naxa xerae xee Manasi bõxi ma, nee fan xa bira a foxo ra. A man naxa xerae xee Aseri, Sabulon, nun Nafatali bõxi ma, mennikae fan naxa kafu a ma.

³⁶ Gedeyon naxa a fala Alatala бe, «Xa i wama Isirayila ratangafe n saabui ra, alo i a masenxi ki naxe, i xa yi raba n бe.

³⁷ N xa yexee kiri itala lonyi xun, a xa lu menni koe ra. Xa xini doxo yexee kiri nan kansan ma, bõxi tan nabilinyi naxa xara, n fama a kolonde na temui ne, i tan nan Isirayila ratangama n saabui ra, alo i a masenxi ki naxe.»

³⁸ A naxa na raba na ki. Na kuye iba, a naxa keli subaxe ma, a yexee kiri bundu alako a xa a

kolon xa xini dɔxɔxi kiri ma. Ye, pɔoti ya keren naxa mini na kui.

³⁹ Gedeyon man naxa a fala Ala bɛ, «Hali i bɔɔɛ mu te n xili ma, n ma wɔyɛn dɔnxɔɛ nan yi ki. N man waxi seedeɔxɔya nan matofe yi kiri ra. Kiri kansan xa xara, xini xa bɔxi birin bunda.»

⁴⁰ Na kɔɛ ra, Ala naxa na raba na ki. Kiri kansan naxa xara, xini fa bɔxi birin bunda.

7

Madiyankae masɔtɔɛ

¹ Yerubaali, naxan findi Gedeyon na, a nun ɲama naxan birin nu biraxi a fɔxɔ ra, e naxa keli subaxɛ ma, e sa kuru Xarodi dulonyi fɛ ma. Madiyankae nu malanxi kɔɔla biri More geya bunyi.

² Alatala naxa a masen Gedeyon bɛ, «I xa sɔɔrie bara gbo yɛ. Xa n bara Madiyankae sa e sagoe, Isirayilakae fama nɛ e yetɛ wasude n na, e a fala, <Muxu tan nan muxu yetɛ kan natangaxi.>

³ I xa ɲama yaamari, <Gaaxui bara naxee birin sɛrɛn, e xa gbilen Galadi geya yire.>» Xɛmɛ mixi wulu mɔxɔɔɛn a nun firin naxa gbilen, kɔnɔ xɛmɛ mixi wulu fu tan naxa lu naa.

⁴ Alatala naxa a masen Gedeyon bɛ, «Han ya ɲama man gbo. Goro e ra xure biri, n fama e mayegetide mɛnni nɛ. N na a fala i bɛ naxan na, wo nun yi nan sigama, wo nun na kanyi xa siga. N na a fala xɛmɛ naxan birin na, e mu sigama, nee naxa bira i fɔxɔ ra.»

⁵ A naxa ɲama ragoro xure dɛ ra. Alatala naxa a masen Gedeyon bɛ, «Naxee birin na ye kɔn e nɛnyi ra alɔ bare, i xa nee ti e xati ma. Naxee

fan birin na e xinbi sin, e ye min, i xa nee fan ti e xati ma.»

⁶ Naxee birin ye kɔ e belexe kui, e naxa a min, e konti naxa siga xeme mixi keme saxan. Nama donxɔe naxa e xinbi sin, e nu fa ye kon e nenyi ra.

⁷ Alatala naxa a masen Gedeyon be, «Yi xeme mixi keme saxan naxee ye koxi e belexe kui, n fama wo ratangade e tan nan saabui ra. N Madiyankae sama ne i sago. Yi nama donxɔe, kankan xa siga a xonyi.» E naxa fandɛ tongo a nun feri naxee nu na pamae yi.

⁸ Gedeyon naxa e ragbilen e xonyi, na xeme mixi keme saxan gbansan naxa lu a yire. Madiyan xa soorie nu na a labe ra geya bunyi.

⁹ Na kɔe ra Alatala naxa a masen Gedeyon be, «I xa goro Madiyan soorie yire, barima n bara e sa i sagoe.

¹⁰ Xa gaaxui na i ma yi gere xa fe ra, wo nun i xa konyi Pura xa goro Madiyankae yire.

¹¹ I naxan mema naa, na fama i ralimaniyade. Goro e xa soorie yire sinden.» A tan nun a xa konyi Pura naxa goro, han soorie yonkinde fe ma.

¹² Madiyankae, Amalekikae, nun bɔnsɔe gbɛtɛ naxee keli sogetede, nu na geya bunyi. E wuya alɔ katɔe. E xa jɔxɔme fan nu wuya alɔ meyenyi naxan na baa de ra.

¹³ Gedeyon to naa li, xeme nde naxa a xa xiye fala a boore be. A naxa a masen, «N yi xiye nan saxi. N taami ganxi nan toxi a firifirima Madiyan soorie yonkinde. A naxa a bonbo kiri banxi nde ra, a a rabira.»

14 A boore naxa a yaabi, «A mu findixi sese ra fo Gedeyon xa santidεgεma, Yowasi xa di Isirayilaka. Ala bara Madiyankae nun e xa sōorie sa a sago.»

15 Gedeyon to γε xiye xa fe tagi raba ramεde, a naxa a felen bōxi ma, a Ala tantu. Na xanbi, a naxa gbilen Isirayila sōorie yire, a a fala e bε, «Wo keli, barima Alatala bara Madiyan sōorie sa won sagoe.»

16 A naxa yi xεmε mixi kεmε saxan itaxun dōxo saxan na. A fa feri nun fεnε lanmadie so e birin yi ra, tε na fεnεe kui.

17 A naxa a fala e bε, «Wo xa n mato, n na naxan naba, wo fan xa na raba. N nefε sōorie yire li, n na naxan naba, wo fan xa na raba.

18 Muxu feri fema tεmui naxε, wo fan xa wo gbe fe sōorie yonkinde rabilinyi. Wo xa a fala wo xui itexi ra, «Alatala nun Gedeyon bε!»

19 Gedeyon nun a xa sōori mixi kεmε saxan, naxa Madiyan sōorie yire li, e e xa yire makan-tade masara kōε tagi tεmui naxε. E naxa feri fe, e fεnεe ibōō.

20 Yi mixi kuru saxanyie naxa feri fe, e naxa fεnεe ibōō, tε suxuxi e kōola bεlεxεe ra, feri suxuxi e yirefanyi bεlεxεe ra e naxan fema. E nu fa a fala e xui itexi ra, «Won xa gere so Alatala nun Gedeyon bε.»

21 E birin naxa ti e tide, Madiyan sōorie rabilinyi. Madiyankae naxa e gi, e siga sōnxō ra.

22 Isirayila sōori mixi kεmε saxanyie nu feri fe tεmui naxε, Alatala naxa a niya Madiyankae xa e boore faxa santidεgεma ra. Sōori dōnxōεe naxa e

gi han Beti Sita, Serera mabiri, han Abeli Mexola, Tabati mabiri.

²³ Isirayila xemɛɛ naxa e malan, Nafatalikae, Aserikae, nun Manasikae. E birin naxa Madiyankae kerɪ.

²⁴ Gedeyon naxa xɛɛrae xɛɛ Efirami geyae yire, e xa a fala, «Wo goro Madiyankae ya ra, wo singe xa ti Yurudɛn xure igirima dɛnnaxɛ han Beti Baara.» Na kui Efirami xemɛɛ naxa e malan, e siga Yurudɛn xure igirima dɛnnaxɛ, han Beti Baara.

²⁵ E naxa Madiyankae xa mangɛ firinyie suxu, Orebi nun Seebi. E naxa Orebi faxa Orebi fanye yire, e naxa Seebi faxa Seebi wɛni bogi bunduma dɛnnaxɛ. E naxa Madiyankae kerɪ, e fa Orebi nun Seebi xunyie ra Gedeyon xɔn Yurudɛn fɛ ma.

8

Madiyankae bɔnbɔfe

¹ Efirami xemɛɛ naxa a fala Gedeyon bɛ, «I yi mɔɔli rabaxi muxu ra munfe ra? I to siga Madiyankae gereɛde, munfe ra i mu muxu xili, won birin xa siga?» Sɔnxɔɛ belebele naxa bira a i e tagi.

² A naxa e yaabi, «Wo naxan nabaxi, na dangi n gbe rabaxi ra pon. Eframikae xa wali lanmadi tide gbo Abiyeseri bɔnsɔɛɛ xa wali xungbe bɛ.

³ Alatala Madiyankae xa mangɛ Orebi nun Seebi saxi wo tan nan sago. N munse rabaxi naxan tide gbo na bɛ?» A to gɛ wɔyɛnde, e bɔɔɛ naxa goro.

4 Hali Gedeyon nun a xa soorie mixi keme saxanyie to nu taganxi, e Yuruden igiri ne Madiyankae kerife ra.

5 A naxa a fala Sukotikae be, «N bara wo maxandi, wo taami nde so n ma mixie yi ra, barima e bara tagan. N na Madiyankae xa mangee Seba nun Salamuna nan kerife.»

6 Sukoti mangee naxa Gedeyon yaabi, «Wo jan bara ge Seba nun Salamuna suxude? A lanma muxu xa taami so i xa soorie yi ra munfe ra?»

7 Gedeyon naxa a fala, «Alatala na Seba nun Salamuna sa n sago temui naxe, n fama wo fatee mabode gbengberen yire tunbee nan na.»

8 Gedeyon naxa keli menni, a siga Peniyeli. A naxa mennikae fan makula taami ra. Peniyelikae fan naxa a yaabi alo Sukoti mixie a yaabi ki naxe.

9 A naxa a fala nee fan be, «N na xunnakeli soto, n fama be wo xa taa tete birin nabirade.»

10 Seba nun Salamuna nu na Karakore, e nun e xa soori mixi wulu fu nun suuli jondon. E tan gbansan nan nu luxi. Soori mixi wulu keme mixi wulu moxonen nu bara faxa santidegema ra bonsode ya ma naxee kelixi sogetede.

11 Gedeyon naxa te kira xon ma Noba nun Yogbeha sogetede biri. A naxa soorie bonbo naa, naxee nu laxi a ra a gere mu e lima sonon.

12 Madiyan mangee Seba nun Salamuna fan naxa e gi. Gedeyon naxa bira e foxo ra, han a e suxu, a fa e xa soorie birin nagi.

13 Yowasi xa di Gedeyon to fa kelife gere sode Xeresε geya fari,

¹⁴ a naxa Sukoti fonike nde suxu, a a karaxan a xa Sukoti mangеe nun kuntigie xilie sebe a be. Nee naxa lan mixi tongo solofere a nun solofere ma.

¹⁵ Gedeyon naxa siga Sukoti, a a fala e be, «Seba nun Salamuna nan yi ki, wo n konbi naxee xa fe ra. Wo naxa a fala, <Wo jan bara ge Seba nun Salamuna suxude? A lanma muxu xa taami so i xa soorie yi ra munfe ra?>»

¹⁶ Na kui a naxa taa kuntigie suxu, a e bonbo gbengberen yire tunbee ra.

¹⁷ A naxa Peniyeli tete fan nabira, a fa mennikae faha.

¹⁸ Gedeyon naxa Seba nun Salamuna maxorin, «Wo mixi naxee faha Taboro, e nu na di?» E naxa a yaabi, «E nu ne alo i tan. E birin nu luxi alo mangedia.»

¹⁹ Gedeyon naxa a fala e be, «N taarae nan nu na e ra, n nga xa die. N bara n kali Alatala pipе ra, xa wo mu e faha nu, n fan mu wo faxama nu.»

²⁰ A naxa a fala Yeteri be, a xa di singe, «E faha!» Konо Yeteri mu a xa santidegema ba a tee i, barima fonike nan nu a ra, a gaaxuxi.

²¹ Seba nun Salamuna naxa a fala Gedeyon be, «Xa xeme nan i ra, i tan yete yati xa muxu faha.» Gedeyon naxa keli keren na, a e faha. A naxa konmagoree ba e xa joxomee kon ma.

²² Isirayila xeme naxa a fala Gedeyon be, «I xa findi muxu xa mangе ra, na dangi xanbi i xa di, nun na xa di. I bara muxu ratanga Madiyankae ma.»

²³ Gedeyon naxa a fala e be, «N tan nun n ma di, muxu mu findima wo xa mangе ra. Alatala

nan na wo xa mangе ra.»

²⁴ Gedeyon man naxa woyen e бe. A naxe, «Xa wo bara tin, a xoli n ma kankan xa xurunde keren so n yi ra, wo naxan sotoxi wo wasaso see ra gere kui.» Xurunde xema daaxi nu soxi Madiyankae belexee ra, barima e kelixi Sumayila bonsoe ne.

²⁵ E naxa a fala, «Muxu bara tin na ra.» E fa dugi itala, e birin fa e xa xurunde keren keren sa dugi kui e naxan soto wasaso see ra.

²⁶ Gedeyon xema naxan maxorin, a binye naxa siga han kilo moxoren, bafe xunmasee ra, tuli rasoe, donma gbeeli Madiyan mangе daaxi, a nun joxome konmagore.

²⁷ Gedeyon naxa serexedube kuntigi donma yailan na xema ra, a a ti Ofara, a xa taa kui. A raponyi, na naxa findi gantanyi ra Gedeyon nun a xa denbaya be, barima Isirayilakae birin naxa na findi e xa ala ra.

²⁸ Isirayilakae naxa Madiyan lu e xa noe bun ma, nee mu xunnakeli soto sonon. Boxi naxa lu bopesa kui je tongo naani Gedeyon xa simaya kui.

²⁹ Yowasi xa di Yerubaali naxa gbilen a xonyi.

³⁰ Gedeyon naxa di tongo solofere bari, barima gine gbegbe nan nu doxoxi a xon.

³¹ A xa konyi gine naxan nu na Sikemi, na fan naxa di xeme bari a be. A naxa Abimeleki xili fala a xun.

³² Yowasi xa di, Gedeyon naxa faxa simaya fanyi kui. E naxa a ragata Yowasi xa gaburi yire Ofara, Abiyesa bonsoe nu na dennaxe.

³³ Gedeyon to faxa, Isirayilakae man naxa Alatala beɲin, e xa Bali kuyee batu. E naxa Bali Beriti findi e xa ala ra.

³⁴ Isirayilakae naxa neemu e Marigi Alatala ma, naxan e ratanga e yaxui birin belexe i, naxee nu e rabilinxi.

³⁵ E mu dugutegeɲa rasiga Yerubaali xa denbaya ma fefe ma, hali a to nu bara fe fanyi gbegebe raba Isirayila be.

9

Abimeleki findife mange ra

¹ Yerubaali xa di Abimeleki naxa siga Sikemi a nga xunyie yire. A naxa yi masenyi ti a nga xabile be,

² «Katarabi Sikemi kuntigie birin ma, <Wo wama a xon ma Yerubaali xa di tongo solofere birin xa findi wo xa mange ra, ka mixi keren gbansan xa findi wo xa mange ra? Wo xa wo ratu a ma, won findixi wuli keren fase keren nan na.>»

³ A nga xunyie naxa na masenyi birin tagi raba Sikemi kuntigie be. Kuntigie naxa tin birafe Abimeleki foxo ra, barima e ngaxakerenyi nan nu a ra.

⁴ E naxa gbeti kilo solomasaxan fi a ma, kelife Bali Beriti xa salide kui. Abimeleki naxa kobiri so xeme rabeɲinxie nun kalabantee yi ra, alako e xa bira a foxo ra.

⁵ A naxa siga a baba xonyi Ofara, a a xunya e birin faxa. Yerubaali xa di tongo solofere birin naxa faxa fanye keren fari, fo Yotami, Yerubaali xa di donxoe, naxan nu bara a noxun e ma.

⁶ Sikemi kuntigie nun Beti Milo jama birin naxa e malan Sikemi, γεμε belebele nun wuri tofanyi tixi dennaxe. E naxa Abimeleki findi mange ra menni.

⁷ Yotami to na fe με, a naxa siga a sa ti Garisimi geya fari, a fa a fala a xui itexi ra, «Sikemi kuntigie, xa wo wama νε Ala xa a tuli mati wo ra, wo xa wo tuli mati n tan na.

⁸ Λοχοε nde, wuri bilie naxa a nate e xa mange keren sugandi. E naxa a fala oliwi bili βε, <Findi muxu xa mange ra.>

⁹ Κονο oliwi bili naxa e yaabi, <N tan mu gbilenma n ture raminife φοχο ra, ture naxan findima binya se ra Ala nun mixie βε, alako n xa nu sa n iyan wuri bilie xun.>»

¹⁰ «Wuri bilie naxa a fala χορε bili βε, <I tan xa fa be, i xa findi muxu xa mange ra.>

¹¹ Κονο χορε bili naxa a fala e βε, <N tan mu gbilenma n bogi ποχυνμε fanyi raminife φοχο ra, alako kansan n xa nu sa n iyan wuri bilie xun.>»

¹² «Wuri bilie naxa a fala weni bili βε, <I tan xa fa be, i xa findi muxu xa mange ra.>

¹³ Κονο weni bili naxa e yaabi, <N tan mu gbilenma n ma weni raminife φοχο ra naxan Ala nun mixie ρασεωwama, alako kansan n xa nu sa n iyan wuri bilie xun.>»

¹⁴ «Na kui wuri bilie naxa a fala tunbe kungsi βε, <I tan xa fa be, i xa findi muxu xa mange ra.>

¹⁵ Tunbe kungsi naxa wuri bilie yaabi, <Xa wo waxi πανige fanyi nan nabafe n βε alako n xa findi wo xa mange ra, wo fa be, wo xa fa lu n niini bun ma. Xa na mu a ra, τε minima νε tunbe kungsi kui, a Liban wuri bili fanyi birin gan.>»

16 Yotami man naxa a masen e бε, «Yakosi, wo tan Abimeleki findife mangε ra, wo a rabaxi tinxinyi nan ma? Wo fe fanyi nan nabaxi Yerubaali nun a xa denbaya ra na ki? Wo a xa fe fanyi sare ragbilenxi a ma na ki нε?

17 N baba gere soxi нε wo tan бε, a a nii fi gere ma, a wo ratanga Madiyankae бεлεε i.

18 Kɔnɔ wo tan, wo bara keli n baba xa denbaya xili ma to lɔxɔε, wo bara a xa di xeme mixi tongo solofere faxa fanye keren fari, wo fa Abimeleki findi mangε ra kuntigie xun ma Sikemi. Wo bara Gedeyon xa konyi ginε xa di findi wo xa mangε ra, barima wo ngaxakerenyi lanxi a tan nan ma.

19 Xa na birin kelixi janige fanyi nun tinxinyi nan ma Yerubaali nun a xa denbaya mabiri, awa wo tan nun Abimeleki xa rafan wo boore ma.

20 Xa na mu a ra, тε xa mini Abimeleki, a xa Sikemi kuntigie nun Beti Milo mixie gan. Tε xa mini e fan ma, a xa Abimeleki gan!»

21 Yotami naxa keli naa, a sa a nɔxun Beerі, dennaxe makuya a taara Abimeleki ra.

22 Abimeleki naxa Isirayila yamari jε saxan bun ma.

23 Na тεmui, Ala naxa xaxili kobi raso Abimeleki nun Sikemi kuntigie tagi. Sikemi kuntigie fa Abimeleki yanfa.

24 Na kui e birin xa e xa fe jaaxi sare soto. Abimeleki nu bara a ngaxakerenyie faxa, Yerubaali xa di tongo solofere. Sikemikae nu bara Abimeleki mali na faxε tife ra.

25 Sikemi kuntigie naxa mixie ti yanfanteya ra Abimeleki xili ma geyae xun tagi, e nu mixie fetenken naxee nu dangima kira ra e yire.

Abimeleki naxa na fe мε.

²⁶ Λοχοε nde Ebedi xa di Gaali nun a xunyaе naxa fa Sikemi. Taa kuntigie naxa lanlanteya sa a ma.

²⁷ E birin naxa siga weni bilie yire, e xa weni bogi ba. E naxa na bogie bundu, e fa xulunyi ti. E naxa so e xa ala batude kui, e naxa e dege, e e min, e fa Abimeleki danka.

²⁸ Ebedi xa di Gaali naxa a fala e βε, «Won tan Sikemikae luxi Abimeleki xa ное bun ma munfe ra? Yerubaali xa di xa mu lanxi a ma? Abimeleki mu Sebulu xa findixi taa gomina ra? A lanma wo xa lu Hamori xa mixie tan xa yaamari bun ma, barima Hamori nan Sikemi benba ra. Won luxi Abimeleki xa mangeya bun ma munfe ra?

²⁹ Xa Sikemikae fa bira n tan φοχο ra nu, n Abimeleki kerima ne keren na.» Na masenyi dangi xanbi, Gaali naxa a fala Abimeleki βε, «I xa σοοrie ramini, won xa gere.»

³⁰ Sebulu, taa gomina to Ebedi xa di Gaali xa masenyi мε, a βοηε naxa te.

³¹ A naxa χεεραε χεε gundοηοχοηα ra Abimeleki χον, e xa a fala a βε, «Ebedi xa di Gaali nun a xunyaе bara fa Sikemi, e na taa mixie βοηε ratefe i xili ma.

³² Keli, i xa fa to κοε ra, i tan nun pama naxan birin biraxi i φοχο ra, wo xa taa melen.

³³ Subaxe, i xa keli, i fa taa suxu. Gaali nun a xa mixie na ti wo ya ra, wo xa wo senβε masen e βε.»

³⁴ Abimeleki nun a xa σοοri xunde naani naxa keli κοε ra, e sa Sikemi melen.

³⁵ Ebedi xa di Gaali to keli γεεσεγε, a sa ti taa sode δε ra, Abimeleki nun a xa σοοrie naxa mini

kenε ma.

³⁶ Gaali to soorie to, a naxa a fala Sebulu be, «Nama nde nan na gorofe geya fari yi ki.» Sebulu naxa a yaabi, «I geya niini nan findixi mixie ra na ki.»

³⁷ Gaali man naxa a fala, «Nama yati nan na gorofe taa kui yi ki. Nama gbete fan na fafe sematoe xa wuri bili kira xon.»

³⁸ Sebulu naxa a yaabi, «I xa woyen xungbe na minden, i tan naxan nu a falama, <Sikemi luxi Abimeleki xa yaamari bun ma munfe ra?> I mu nu yi mixie konbi xe? Siga, i sa e gere.»

³⁹ Gaali naxa ti Sikemi kuntigie ya ra, e naxa Abimeleki gere.

⁴⁰ Mixi gbegbe naxa faxa taa sode de ra. Abimeleki naxa Gaali keru

⁴¹ han Aruma. Sebulu naxa Gaali ngaxakerenyie keru Sikemi kui, hali keren, a mu lu naa.

⁴² Na kuye iba, pama naxa siga daaxa. Abimeleki to na fe kolon,

⁴³ a naxa soorie tongo, a e itaxun xunde saxan na. E naxa e noxun daaxa han pama birin naxa mini, e fa keli e xili ma, e e bonbo.

⁴⁴ Abimeleki xa xunde naxa sa ti taa sode de ra. Boore xunde firinyi naxa sin na mixie ma, naxee nu na daaxa, e naxa e birin sonto.

⁴⁵ Abimeleki naxa gere so na taa ma yanyi birin, han a naxa no a ra, a mennikae birin faxa. A man naxa na taa rabira, a foxe sa na ma.

⁴⁶ Sikemikae naxee luxi, e to na fe me, e naxa so Eli Beriti kuye xa salide kui.

⁴⁷ E naxa sa a fala Abimeleki be, a Sikemi taa kuntigie bara malan salide kui.

48 Na kui Abimeleki naxa te Salamon geya fari nun pama naxan nu biraxi a fɔxɔ ra. Abimeleki naxa beera suxu a belexe. A naxa wuri salonyi nde sege, a a sa a kon ma. Na xanbi, a naxa a fala pama be naxan nu biraxi a fɔxɔ ra, «Wo bara a to n naxan nabaxi? Wo fan xa na mooli raba mafuren mafuren.»

49 Nama birin naxa wuri salonyi keren keren sege, e fa bira Abimeleki fɔxɔ ra. E naxa na wurie ti na salide sode de ra, e fa te so, e mixi birin gan. Sikemika wulu keren, ginne nun xemee, naxa sonto na ki.

50 Na dangi xanbi, Abimeleki naxa siga Tebeti, a xa mennikae gere. A to yonkinde yailan menni, a naxa no Tebeti ra.

51 Makantade itexi nde nu na taa tagi, xemee nun ginne naxa sa e noxun menni, a nun taa kuntigie. E naxa na balan e xun ma, e tixi na fari.

52 Abimeleki to menni li, a naxa makore a naade ra alako a xa te sa na ma.

53 Na nan lan gine nde naxa mengi din se geme daaxi sin Abimeleki xunyi, a xunyi naxa bo.

54 Abimeleki naxa a fala a xa fonike be, naxan nu a xa geresose xaninma, a naxe, «I xa santidegema ba a tee i, i xa n nanon, alako mixi naxa a fala gine nan n faxaxi.» Na kui na fonike naxa a soxo santidegema ra, a a faxes.

55 Isirayila xemee to a to Abimeleki bara faxes, e birin naxa gbilen e xonyi.

56 Na kui Ala Abimeleki xa wali kobi ragbilen ne a ma, a naxan naba a baba ra, a xunya tongo solofere faxafe ra.

⁵⁷ Ala na tōōrē birin nagbilen nē Sikemikae ma e xa kobijna sare ra. Yerubaali xa di xēmē Yotami xa danke naxa e birin nayarabi.

10

Isirayila kiitisa Tola

¹ Abimeleki to faxa, Puwa xa di Tola, Dodo xa mamadi, naxan fatanxi Isakari bōnsōē ra, a naxa keli a xa Isirayila ratanga. A nu sabatixi Samiri nē, Efirami geyae fari.

² A naxa findi kiitisa ra Isirayila jē mōxōjēn nun saxan. Na xanbi a naxa faxa, e sa a ragata Samiri.

Isirayila kiitisa Yayiri

³ Tola to dangi, Yayiri Galadika naxa keli, a findi Isirayila kiitisa ra jē mōxōjēn nun firin.

⁴ Di tongo saxan nan nu na a bē. E nu jērema sofale tongo saxan nan fari, e nu taa tongo saxan yamarima Galadi bōxi ma. Han to na taaē xili falama Yayiri xa taaē.

⁵ Yayiri naxa faxa, e sa a ragata Kamon.

Isirayila kiitisa Yefite

⁶ Isirayilakae man naxa fee raba naxan mu rafan Alatala ma. E naxa Bali nun Asitarate kuye batu, Aramikae xa alae, Sidōnkāe xa alae, Mowabakae xa alae, Amonikae xa alae, a nun Filisitakae xa alae. E naxa Alatala finsiriwali, e tondi tuubide a bē.

⁷ Alatala bōjē naxa te Isirayila xili ma, a fa e sa Filisitakae nun Amonikae sagoe.

⁸ E naxa Isirayilakae tōōrō, e e jaxankata na jē bun ma. E man naxa Isirayilakae jaxankata

naxee fan nu sabatixi Yurudɛn naakiri ma, Amonikae xa bɔxi ma, ɲɛ fu nun solomasaxan bun ma.

⁹ Amonikae naxa dangi Yurudɛn na, alako e xa sa Yudaya, Bunyamin, nun Efirami fan gere. Isirayila bɔɲɛ tɔɔɔɔ nɛ ki fanyi na waxati.

¹⁰ Isirayilakae naxa Alatala xili e xui itexi ra, e nu fa a fala, «Muxu bara yunubi raba i ra, barima muxu bara gbilen muxu Marigi Ala fɔxɔ ra, muxu man bara Bali kuyee batu.»

¹¹ Alatala naxa a masen Isirayilakae bɛ, «Misirakae, Amorikae, Amonikae, Filisitakae,

¹² Sidɔnkae, Amalɛkikae, nun Mayonkae to wo tɔɔɔɔ, wo naxa n xili wo xui itexi ra. Na tɛmui, n mu wo ba xɛ e sagoe?

¹³ Kɔnɔ wo tan bara n finisiriwali, wo fa ala gbɛtɛɛ batu. Na nan a toxi n mu wo ratangama sɔnɔn.

¹⁴ Wo sa sɔnxɔ wo xa alae ra, wo naxee sugandixi. E xa wo ratanga wo xa tɔɔɔɛ ma.»

¹⁵ Isirayilakae naxa a masen Alatala bɛ, «Muxu bara yunubi raba. I xa i waxɔnfe raba muxu ra, kɔnɔ yandi i xa muxu rakisi to.»

¹⁶ Na tɛmui e naxa gbilen si gbɛtɛɛ xa alae fɔxɔ ra, e fa Alatala batu. Alatala nu bara kinikini e ma e xa tɔɔɔɛ kui.

¹⁷ Amonikae naxa e malan, e sa kuru Galadi. Isirayilakae fan naxa e malan, e sa kuru Misipa.

¹⁸ Galadi ɲama nun mangɛɛ nu fa a fala e boore bɛ, «Xɛmɛ mundun fama yi gere fɔlode Amonikae ma? Na kanyi nan findima Galadikae xa mangɛ ra.»

11

Isirayila kiitisa Yefite

¹ Yefite Galadika, gereso hagige nan nu na a ra. Langoe gine nde nun Galadi nan ma di nu a ra.

² Galadi xa gine naxa die bari a be. Na gine xa die naxa mo, e fa Yefite kerі, e a fala a be, «I mu fama muxu baba ke sotode, barima gine gbete nan ma di lanxi i ma.»

³ Yefite naxa keli, a makuya a taarae ra, a sa sabati Tobo boxi ma. Menni xeme rabepinxie naxa lu a fe ma, e xa bira a foxo ra.

⁴ Na dangi xanbi, Amonikae to Isirayilakae gere,

⁵ Galadi forie naxa siga Yefite fende Tobo boxi ma.

⁶ E naxa a fala Yefite be, «Won xee, i xa findi muxu xa yarerati ra alako won xa Amonikae gere.»

⁷ Yefite naxa Galadi forie yaabi, «Wo mu n xonxi xe? Wo mu n kerі n baba xa banxi kui? Munfe ra wo n fenma yakosi wo xa toore kui?»

⁸ Galadi forie naxa a fala Yefite be, «Na fe yati nan a xeexi muxu faxi i yire yakosi, alako won birin xa siga, i xa Amonikae gere, i man xa findi Galadikae birin xa mange ra.»

⁹ Yefite naxa Galadi forie yaabi, «Xa wo n nagbilen alako n xa Amonikae gere, xa a sa a li Alatala naxa e sa n sagoe, n tan yati nan findima wo xa mange ra.»

¹⁰ Galadi forie naxa a fala Yefite be, «Alatala bara findi won seede ra, muxu fama i xa woyenyi rakamalide.»

¹¹ Yefite nun Galadi forie naxa siga, pama naxa a findi e xa mange nun e xa soorie yarerati ra.

Yefite naxa gbilen a xa masenyi birin ma Alatala ya i Misipa.

¹² Yefite naxa xεεrae xεε Amonikae xa mange xɔn, e xa a fala a bε, «Munfe ra i faxi n gereḁe n ma bɔxi ma?»

¹³ Amonikae xa mange naxa Yefite xa xεεrae yaabi, «Isirayilakae to keli Misira, e naxa n ma bɔxi birin tongo fɔlɔfe Arinon xure ma, sa dɔxɔ Yaboko xure ra, han Yurudɛn xure. I xa na ragbilen n ma lanyi kui.»

¹⁴ Yefite man naxa xεεrae xεε Amonikae xa mange xɔn.

¹⁵ E xa a fala a bε, «Yefite wɔyɛn xui nan yi ki. Isirayilakae mu Mowaba bɔxi nun Amoni bɔxi yo tongoxi.

¹⁶ Isirayila ɲama to keli Misira bɔxi ma, e naxa e ɲεε gbengberenyi ma han Xulunyumi Baa, e fa so Kadesi.

¹⁷ Na tɛmui Isirayila naxa xεεrae xεε Edon mange xɔn, e xa a fala a bε, «A lu muxu xa dangi i xa bɔxi ma.» Kɔnɔ Edon mange mu tin na ra fefe ma. E naxa xεεrae xεε Mowaba mange fan xɔn. A naxa tondi, Isirayilakae fa lu Kadesi.»

¹⁸ «Na dangi xanbi, e naxa Edon bɔxi nun Mowaba bɔxi mabilin gbengberenyi ma. E e ɲεε Mowaba bɔxi sogetede biri, han e Arinon xure igiri. Na kui e mu soxi Mowaba bɔxi ma, barima Arinon findixi Mowaba xa naaninyi nan na.

¹⁹ Na tɛmui Isirayilakae naxa xεεrae xεε Sixɔn xɔn, Amorikae xa mange naxan nu na Xesibɔn. Isirayilakae naxa a fala a bε, «A lu muxu xa mini i xa bɔxi ra, muxu xa siga muxu xa bɔxi ma Ala naxan sugandixi muxu bε.»

²⁰ Kɔnɔ Sixɔn mu tin Isirayilakae xa mini a xa bɔxi ra. A naxa a xa ɲama birin malan, e naxa kuru Yahasi, e Isirayila gere.

²¹ Isirayila Marigi Alatala naxa Sixɔn nun a xa ɲama sa Isirayila sagoe. Isirayilakae naxa nɔ e ra, e fa sabati Amorikae xa bɔxi birin ma,

²² folɔfe Arinon xure ma, sa dɔxɔ Yaboko xure ra, folɔfe gbengberenyi ma, sa dɔxɔ Yurudɛn na.»

²³ «Isirayila Marigi Alatala bara Amorikae xa bɔxi fi muxu ma, i tan wama na bɔxi bafe muxu yi munfe ra?

²⁴ I xa ala Kemosi, a bɔxi naxan soxi i yi ra, i mu i wasasoma nɛ? Muxu fan, muxu Marigi Alatala bɔxi naxan birin soxi muxu yi ra, muxu na suxuma nɛ.

²⁵ I ɲɔxɔ a ma i senbɛ dangixi nɛ Balaki ra, Siporo xa di, Mowaba mangɛ? Na tan mu tin Isirayila gerede fefe ma.

²⁶ Nɛ keme saxan nan yi ki, Isirayila sibatixi Xesibɔn nun a rabilinyie, Aroweri nun a rabilinyie, a nun taa birin naxee na Arinon xure dɛ ra. Munfe ra wo mu e rasuxu na waxati bun ma?

²⁷ N tan mu haake yo rabaxi i ra. I tan nan fe ɲaaxi rabafe n na, gere tife n bɛ. Alatala, kiitisa xungbe, a xa Isirayilakae nun Amonikae makiiti to lɔxɔɛ.»

²⁸ Amonikae xa mangɛ mu tin a tuli matide Yefite xa masenyi ra.

²⁹ Alatala Xaxili naxa goro Yefite ma. Yefite naxa Galadi nun Manasi igiri. A naxa dangi Misipa ra Galadi bɔxi ma. A naxa siga han Amonikae xa bɔxi ma.

³⁰ Yefite naxa laayidi tongo Alatala be, a a fala a be, «Xa i sa Amonikae birin sa n sagoe,

³¹ naxan singe na mini n ma banxi naade ra fafe n nalande, n ne gbilenma kelife ra Amonikae xa boxi ma seewe kui temui naxe, na kanyi bama serexe gan daaxi nan na Marigi Alatala be.»

³² Yefite naxa siga Amonikae xa boxi ma e gere. Alatala naxa e sa a sago.

³³ A naxa e bonbo a xoxoxe ra folo Aroweri ma, sa dexo Miniti biri ra, taa moxonen, han Habila Keramimi. Amonikae naxa lu yaagi kui Isirayilakae ya i.

Yefite xa di gine

³⁴ Yefite naxa gbilen Misipa. A to a xonyi li, a xa di gine naxa mini a ralande. A nu fare boronma maxasee xui ra. A xa di kerenyi nan nu a ra, di xeme mu nu na, di gine gbete fan mu nu na a be.

³⁵ A fefe a xa di gine to, a naxa a xa donmae iboo, a a fala, «N ma di gine, i bara n naso toore xungbe kui, i bara a niya n xa sunnun a jaaxi ra. N bara laayidi tongo Alatala be, n mu noma gbilende na ma sonon.»

³⁶ A xa di gine naxa a fala a be, «N baba, i laayidi naxan tongo Alatala be, i xa na rakamali. I naxan fala Alatala be, i xa na raba n na, barima Alatala bara i gbenoxo i yaxui Amonikae ma.»

³⁷ A man naxa a fala a baba be, «I xa fe keren naba n be. I xa mame ti kike firin alako n xa siga geyae fari, a nun n booree, muxu xa wa ti barima n mu fama dexe xeme xon.»

³⁸ A baba naxa a yaabi, «Siga.» A naxa a xa di gine mame kike firin. A nun a booree naxa siga

wa tide geyae fari, barima a mu fama dɔxɔde xεmε xɔn.

³⁹ Na kike firinyie rapɔnyi, a naxa gbilen a baba yire. A baba naxa a xa laayidi tongoxi rakamali. A xa di mu nu xεmε fe kolonxi. Na nan a toxi Isirayilakae naxa yi naamunyi ramini:

⁴⁰ Nε birin Isirayila ginεdimεdie Yefite Galadika xa di ginε xa kinikini rabama nε xi naani, alako e xa ratu a xa fe ma.

12

Eframikae nun Galadikae xa gere

¹ Eframi xεmεe naxa e malan, e Yurudεn igiri. E to Sefon li, e naxa a fala Yefite bε, «Munfe ra i sigaxi Amonikae gere, i mu muxu xili alako won birin xa siga? Muxu fama tε nan sade i xa banxi ma, wo birin xa gan.»

² Yefite naxa e yaabi, «N tan nun n ma pama, nu na lantareya belebele nan kui yi ki, muxu nun Amonikae ra. N wo maxili tεmui naxε, wo mu tin fade n bade e sagoe.

³ N to a to wo mu fafe n natangade, n naxa te Amonikae gere, hali na to findi fe xɔrɔxɔe ra n bε. Alatala naxa e sa n sago. Wo faxi n gere munfe ra?»

⁴ Yefite naxa Galadi xεmεe birin malan, e xa Eframikae gere. Galadi xεmεe naxa Eframikae bɔnbɔ, barima e nu bara a fala, «Wo tan Galadikae, wo wo gixi nε kelife Eframi, wo siga Manasi bɔxi ma.»

⁵ Na gere dangi xanbi, Galadikae naxa ti Yurudεn xure igiride ra gbilenfe ra Eframi bɔxi ma. Eframika nde na wa gbilenfe a xɔnyi kelife

gere yire, fo a xa a fala na Galadikae бє, «N wama Yuruden igirife.» Galadikae na kanyi maxorinma нє, «Eframika nan na i ra?» A na e yaabi, «Ade,»

⁶ Galadikae man a falama a бє, «Awa, a fala ba <Xiboleti>.» Eframikae to mu fata na falade, e tan nu a falama нє, «Kiboleti.» Na kui Galadikae a kolonma na kanyi findixi Eframika nan na naxan wama a gife. E a kɔn naxabama keren na menni Yuruden xure igiride ra. Eframika mixi wulu tongo naani nun firin sontɔ na ki нє.

⁷ Yefite Galadika naxa findi Isirayila kiitisa ra нє senni bun ma. A to faxa, a naxa ragata Galadi taaе tagi.

Isirayila kiitisa Ibisan

⁸ Yefite dangi xanbi, Ibisan Beteleemuka naxa findi kiitisa ra Isirayila.

⁹ A naxa di xeme tongo saxan nun di gine tongo saxan bari. A naxa a xa di ginе fi бɔnsɔе gbete xemeе ma. A man naxa ginе tongo saxan fan fen бɔnsɔе gbeteе ra a xa di xemeе бє. A naxa findi Isirayila kiitisa ra нє solofere bun ma.

¹⁰ Ibisan to faxa, a naxa ragata Beteleemu.

Isirayila kiitisa Elon

¹¹ Ibisan dangi xanbi, Elon Sabulonka naxa findi kiitisa ra Isirayila бɔxi ma нє fu bun ma.

¹² A to faxa, a naxa ragata Ayalon, Sabulon бɔxi ma.

Isirayila kiitisa Abadon

¹³ Ibisan dangi xanbi, Hileli xa di Abadon Piratonka naxa findi kiitisa ra Isirayila.

¹⁴ A naxa di tongo naani nun mamadi tongo saxan soto, e te sofale tongo solofere fari. A naxa findi Isirayila kiitisa ra ɲe solomasaxan bun ma.

¹⁵ Hileli xa di Abadon Piratonka to faxa, a naxa ragata Piraton Efirami bɔxi ma, Amalekikae xa geya fari.

13

Samison barife

¹ Isirayilakae man naxa fe ɲaaxi raba Alatala ya i. Na nan a toxi Alatala naxa e lu Filisitakae sagoe ɲe tongo naani bun ma.

² Dana bɔnsɔe mixi nde nu na Soraha naxan xili Manowa. Dibaritare nan nu a xa gine ra.

³ Alatala xa maleke naxa mini na gine ma, a fa a fala a be, «Hali dibaritare to i ra, i fama tegede, i fa di xeme bari.

⁴ I naxa sese min naxan noma i siiside. I naxa sese don naxan mu seniyenxi,

⁵ barima i fama tegede, i di xeme bari. I naxa a xunyi bi, barima yi di fixi Ala nan ma beenu a xa bari. Na kui a xili <Ala xa Nasari.> A tan nan Isirayilakae rakisi foloma Filisitakae ma.»

⁶ Na gine naxa siga, a sa a fala a xa mɔri be, «Ala xa mixi nde bara fa n yire, a luxi n be alo Ala xa maleke. A magaaxu. N mu a maxorin a kelixi dennaxe, a fan mu a xili fala n be.

⁷ A naxa a masen n be, <I fama tegede, i fa di xeme bari. I naxa sese min naxan noma i siiside. I naxa sese don naxan mu seniyenxi, barima yi di fixi Ala nan ma beenu a xa bari, han a laaxirama temui naxe. Ala xa Nasari na a ra.>»

8 Manowa naxa Alatala maxandi yi ki, «N Marigi, i man xa i xa mixi xεε muxu xɔn ma alako a xa muxu xaran na di xuru ki ra.»

9 Ala naxa Manowa xa dube suxu, a man naxa a xa maleke xεε a xa gine xɔn ma. Manowa xa gine nu dɔxɔxi xe ma a xa mɔri mu nu na naa.

10 A to a to, a naxa a gi keren na, a sa a fala a xa mɔri be, «Xεme naxan fa n yire, a man bara fa.»

11 Manowa naxa keli, a bira a xa gine foxɔ ra. A to na xεme li, a naxa a maxɔrin, «I tan nan woyen n ma gine ra?» A naxa a yaabi, «Iyo.»

12 Manowa man naxa a maxɔrin, «I xa masenyi na kamali temui naxe, a lanma muxu xa na di xuru di?»

13 Alatala xa maleke naxa a yaabi, «I xa gine xa a raba alo n a fala a be ki naxe.

14 A naxa weni sansi bogi yo don, a naxa weni nun a maniye min, a naxa donse seniyentare don. A xa na birin naba alo n a fala a be ki naxe.»

15 Manowa naxa a fala Alatala xa maleke be, «I xa lu be sinden, muxu xa si jin i be.»

16 Alatala xa maleke naxa a yaabi, «Hali n lu be, n mu i xa donse donma, kɔnɔ xa i wama serexe gan daaxi tan bafe Alatala be, na fan.» Manowa mu nu a kolon Alatala xa maleke nan a ra.

17 Manowa naxa a maxɔrin, «I xili di? Muxu xa na kolon alako muxu xa i matɔxɔ i xa masenyi kamalima temui naxe.»

18 Alatala xa maleke naxa a maxɔrin, «I wama n xili kolonfe munfe ra? Gundo nan a ra.»

19 Manowa naxa na si nun farin nde ba serexe gan daaxi ra fanye nde fari Alatala be. Na temui kaabanako nde naxa raba e ya xɔri.

²⁰ Na tɛ nu na tefe koore ma tɛmɔi naxɛ, Alatala xa malekɛ fan naxa te koore ma na tɛ kui. Manowa nun a xa ginɛ to na to, e naxa e felen bɔxi ma.

²¹ Alatala xa malekɛ to siga, Manowa nun a xa ginɛ mu nu a to sɔnɔn. E naxa a kolon Alatala xa malekɛ yati yati nan nu a ra.

²² Manowa naxa a fala a xa ginɛ bɛ, «Won fama faxade ya barima won bara Ala yati yati to.»

²³ A xa ginɛ naxa a yaabi, «Xa Alatala wama won faxafe nu, a mu won ma sɛrɛɛ gan daaxi suxuma nu, a mu na kaabanako masenma won bɛ nu.»

²⁴ Na dangi xanbi, Manowa xa ginɛ naxa di bari. E naxa a xili fala Samison. A naxa mɔ Alatala xa barakɛ kui.

²⁵ Alatala Xaxili naxa goro Samison ma a singe ra Maxane Dana, taa naxan na Soraha nun Esetayoli tagi.

14

Samison xa ginɛ Filisitaka

¹ Lɔxɔɛ nde Samison naxa siga Timina. Menni a naxa sungbutunyi Filisitaka nde to.

² A to gbilen a baba xɔnyi, a naxa a fala a baba nun a nga bɛ, «N bara Filisitaka sungbutunyi nde to Timina. Wo xa na fen n bɛ a xa findi n ma ginɛ ra.»

³ A baba nun a nga naxa a fala a bɛ, «Munfe ra i mu ginɛ fen i ngaxakerenyie ya ma, xa na mu a ra won bɔnsɔɛ ya ma? Na mu fisa Filisitaka nde bɛ, na pama sunnatate?» Samison naxa a baba yaabi, «Na fen n bɛ. A tan nan nafan n ma.»

⁴ A baba nun a nga mu nu a kolon na birin kelixi Alatala nan ma. A nu na gere fenfe Filisita-kae ra, barima na waxati e nu na Isirayilakae yamarife.

⁵ Samison nun a baba nun a nga naxa goro Timina. E to weni bilie yire li, yete nde naxa mini Samison ma, a xa a faxesa.

⁶ Alatala Xaxili naxa goro a ma alako a xa no yete ibode a belexe ra alo si yore, hali geresose yo to mu nu na a yi ra. A mu na fe fala a baba nun a nga be.

⁷ E naxa siga woyende na sungbutunyi ra, naxan bara rasan Samison ma ki fanyi.

⁸ Na biyaasi dangi xanbi, Samison naxa gbilen Timina na sungbutunyi yire, a xa a findi a xa gine ra. Beenun a xa a li, a naxa mini kira ra, alako a xa na yete binbinyi mato. A naxa kumi tee li naa, e ture na yete xorie longori ra.

⁹ A naxa nde tongo a belexe ra, a xa a kon kira xon ma. A to gbilen a bari mixie yire, a naxa nde fi nee fan ma. E naxa a kon, kon Samison mu a fala e be na kumi kelixi dennaxe.

¹⁰ Samison baba fan naxa goro na sungbutunyi xonyi. Na temui Samison naxa xulunyi ti naa, alo segetalae darixi a ra ki naxe.

¹¹ Na sungbutunyi xa mixie to Samison to, e naxa mixi tongo saxan xili naxan luma a seeti ma.

¹² Samison naxa a fala e be, «N xa taali nde sa wo bun ma. Xa wo no na tagi rabade n be beenu yi xulunyi xi solofere xa ba a ra, n donma nun dugi tongo saxan fima wo ma.

13 Kɔnɔ xa wo mu nɔ n ma taali tagi rabade n be, wo keren keren ma birin donma nun dugi tofanyi fima n tan nan ma.» E naxa a fala a be, «Awa yire, i xa taali fala. Muxu muxu tuli matixi i ra.»

14 Na kui a naxa taali nde fala e be, «Naxan se donma, a donse raminima. Se joxunme kelixi senbema nan ma.» E naxa na taali fen xi saxan bun ma, kɔnɔ e mu nɔ na kolonde.

15 A xi naani nde, e naxa a fala Samison xa gine be, «Woyen i xa mɔri be alako a xa na taali tagi raba muxu be, xa na mu a ra muxu fama i tan nun i baba xa denbaya gande. A mu lanma wo xa muxu xili be, wo xa fa muxu muja.»

16 Samison xa gine naxa wa folo a xa mɔri ya i, a a fala a be, «N mu rafan i ma. I bara n xɔn, xa na mu a ra i na taali tagi rabama ne n be nu.» A naxa a yaabi, «N mu naxan fala n nga nun n baba be, n na falama i tan nan be?»

17 Na gine naxa wa Samison ya i xi solofere bun ma, na xulunyi temui. Xulunyi loxoɛ donxoɛ a naxa na taali tagi raba a xa gine be, barima a nu na a toɔrofe tun. Na temui na gine naxa na taali tagi raba a xa mixie be.

18 Beenun soge dula temui xi solofere nde, taakae naxa Samison xa taali fasari a be yi maxorinyi ra, «Munse joxun kumi be, munse senbe gbo yete be?» Samison naxa e yaabi, «Xa wo mu n ma gine mafuruku nu, wo mu nɔma n ma taali kui kolonde feo.»

19 Na dangi xanbi, Alatala Xaxili naxa goro Samison ma. A naxa siga Asikalɔn, a xeme tongo saxan faxesa, a e xa donmae nun dugie tongo, a

nee fi mixie ma naxee nu bara na taali tagi raba a be. Na temui Samison naxa gbilen a baba xonyi, a xonoxi a naaxi ra.

²⁰ Na kui Filisitakae naxa Samison xa gine fi xeme gbete ma, xulunyi binye fixi naxan ma.

15

Samison Filisitakae gerefe

¹ Xe xaba temui, Samison naxa si xanin a xa gine xon. A naxa a fala a bitanyi be, «A xoli n ma n tan nun n ma gine xa lu yire keren.» A bitanyi mu tin na ra,

² a fa a fala Samison be, «N joxo a ma i mæxi a ra ne, na nan a ra, n bara a fi na xeme ma i xa xulunyi binye fi naxan ma. I xa a xunya doxo, na fan a be pon.»

³ Samison naxa a yaabi, «Yi biyaasi, xa n fe naaxi raba wo tan Filisitakae ra, wo tan nan a niyaxi.»

⁴ A naxa siga, a xulumase keme saxan suxu. A naxa nee xuli xiri e boore ra firin firin na, a sexe maxiri e xulie ra.

⁵ A naxa sexe radexe naxan nu maxirixi e xulie ra, a e raberin Filisitakae xa xee ma. Te naxa xee birin gan, sansi naxan nu kotoxi xee ma, a nun sansi naxan mu nu xabaxi sinden. Hali oliwi bili naxee nu na menni, e fan gan ne.

⁶ Filisitakae naxa e booree maxorin, «Nde yi wali rabaxi?» Mixi ndee naxa e yaabi, «Samison foxi nan a ra, barima a bitanyi Timinaka bara a xa gine fi xeme ma, a tan Samison xa xulunyi binye fi naxan ma.» Na kui Filisitakae naxa siga na gine nun a baba gande.

⁷ Samison naxa a fala e be, «Xa wo a raba na ki, n fan n gbeɓɔxɔma ne wo ma.»

⁸ A naxa e gere a jaaxi ra, a mixi gbeɓbe faxa. Na xanbi, a naxa siga, a lu fonme kui Etami geya mabiri.

⁹ Filisitakae naxa soorie xee Yudaya Lexi mabiri.

¹⁰ Yudayakae naxa e maxorin, «Wo faxi muxu gereɗe munfe ra?» E naxa e yaabi, «Muxu faxi Samison nan suxude, muxu xa fe jaaxi raba a ra alo a a rabaxi muxu ra ki naxe.»

¹¹ Yudayakae xeme wulu saxan naxa siga Samison foxo ra Etami geya yire. E naxa a fala a be, «I munse rabaxi muxu ra yi ki? I mu a kolon won na Filisitakae xa yaamari nan bun ma?» Samison naxa e yaabi, «N e xa fe jaaxi nan tun sare ragbilenxi e ma.»

¹² Yudayakae naxa a fala a be, «Muxu faxi be i xiride ne, muxu xa i so e yi ra.» Samison naxa a fala e be «Wo xa wo rakali xa wo tan mu fama n faxade.»

¹³ E naxa a fala a be, «Won bara lan na ma. Muxu mu i faxama. Muxu xa i xiri, muxu xa i so Filisitakae yi ra tun.» E naxa a xiri luuti neene firin na, e a xanin.

¹⁴ E to Lexi li, Filisitakae naxa sonxoe rate. Alatala Xaxili naxa goro Samison ma, a na luutie bolon alo gese ganxi bolonma ki naxe.

¹⁵ A naxa sofale banganyi xori nde tongo boxi ma, a Filisitakae mixi wulu keren faxa na ra.

¹⁶ Samison naxa a fala, «N bara sofale banganyi xori soto, sofale keren sofale gbeɓbe ya ma. N bara xeme wulu keren faxa sofale banganyi xori ra.»

¹⁷ A to ge na masenyi ra, a naxa na banganyi xori wole. Menni xili naxa sa Ramati Lexi, «Banganyi xori geya.»

¹⁸ Ye xoli xoxoxe naxa Samison suxu. A naxa Alatala maxandi, «I bara a niya n xa xutu soto yi mixie ma. N mali alako n naxa faxa ye xoli ma, yi mixi sunnatatee naxa fa n xanin e xonyi.»

¹⁹ Ala naxa fanye iboo Lexi mabiri, ye naxa mini. Samison to ye min, a man naxa senbe soto, a boje naxa sa. E naxa na yire xili fala «Hakore dulonyi.» Han ya na dulonyi na Lexi mabiri.

²⁰ Samison naxa bu kiiti sa ra Isirayila je moxonen Filisitakae xa waxati.

16

Samison nun Dalila

¹ Loxoe nde Samison naxa siga Gasa. A to langoe nde to naa, a naxa so a xonyi.

² Gasakae naxa a kolon Samison nu na na. E naxa menni melen, alako kuye na iba e xa a faxa taa sode de ra.

³ Koe tagi Samison naxa keli, a taa naade suxu, nun a gbakuxi wure naxee ra wurie ma, a na birin tala, a a doxo a tunki fari. A naxa a xanin geya fari naxan na Hebiron ya tagi.

⁴ Na dangi xanbi, Samison naxa gine nde kolon Soreki gulunba naxan xili Dalila. Samison naxa na gine xanu.

⁵ Filisitakae xa mangee naxa siga na gine xon, e a fala a be, «I xa a kolon Samison senbe kelixi dennaxe, alako muxu xa no a ra. Xa i ge na kolonde, muxu a xirima ne, muxu keren keren

ma fa kɔbiri kole wulu keren nun kɔbiri kole keme fi i ma.»

⁶ Na temui Dalila naxa a fala Samison be, «Yandi, i xa i gundo fala n be, i senbe sɔtɔma ki naxe. Mixi nɔma munse rabade, e xa i xiri, e nɔ i ra?»

⁷ Samison naxa a yaabi, «Xa e n xirima luuti neene ra, naxee mu nu xara sinden, n senbe bama n yi, n luma ne alo xeme booree.»

⁸ Filisitakae naxa luuti neene xaratare solofere xanin Dalila xɔn ma. A naxa Samison xiri e ra.

⁹ Filisitakae naxa a xa konkoe melen. Dalila naxa a xui ramini Samison ma, «Filisitakae bara fa i suxude.» Samison naxa na luutie bolon keren na, alo gese naxan ganxi. Na temui e mu nɔ a senbe gundo kolonde.

¹⁰ Dalila naxa a fala Samison be, «I wama n madaxufe ne. I bara wule fala n be. Yakɔsi, yandi, i xa i gundo fala n be. E nɔma i xiride munse ra?»

¹¹ Samison naxa a fala a be, «Xa mixi n xirima luuti neene ra, sese mu nu xiri naxee ra, n senbe luma alo adamadi birin na ki naxe.»

¹² Dalila to ge a xiride luuti neene ra, a naxa gbelegbele, «Samison, Filisitakae bara fa i suxude!» Filisitakae nu bara a xa konkoe melen. Samison naxa luuti bolon a xirixi naxan na alo gese bolonma ki naxe.

¹³ Dalila naxa a fala Samison be, «Han to i na n madaxufe, i wule nan tun falafe n be. A fala n be a lanma i xa xiri se naxan na.» Samison naxa a yaabi, «N xunsexe, naxan denbexi solofere ra, xa i na birin dege mabɔe dugi ra, wo naxa dugi sɔxɔ se fan sɔti n xunsexe kui, a sa sɔron bɔxi, n senbe luma alo adamadi birin na ki naxe.»

¹⁴ Dalila to γε dugi σοxо se sode a fanyi ra, a man naxa gbelegbele, «Samison, Filisitakae bara fa i suxude!» Samison naxa xunu, a naxa dugi σοxо se birin tala.

¹⁵ Dalila naxa a fala Samison бе, «I naxe a marafanyi na won tagi, kоnо n ma xanunteya mu na i бе. A sanya saxan nan ya i n madaxuma. Han to i tondixi i gundo falade n бе, i senbe kelixi dennaxe ma.»

¹⁶ Λοxοе birin Dalila nu a tоrоma yi woyenyi mooli ra. A to dоxо a ra,

¹⁷ Samison naxa a gundo fala a бе, a naxe, «Kafi n bari temui n xunyi mu bixi, barima e n fixi Ala nan ma, Ala xa Nasari nan n na. Xa n xunyi bi, n senbe luma alo adamadi birin gbe na ki naxe.»

¹⁸ Dalila to a kolon Samison bara nondi yati yati fala a бе, a naxa Filisita mangеe xili, a fa a fala e бе, «Wo man xa fa, barima yi biyaasi a bara a xa gundo fala n бе.» Filisita mangе naxa siga a xonyi, e man kobiri xanin e saataxi naxan ma.

¹⁹ Dalila naxa Samison raxi, a saxi a sanyi ma. A naxa xeme nde xili, a naxa Samison xunsexe denbexi solofere maxaba. Na bara a niya Dalila xa no a ra. A senbe birin nu bara siga.

²⁰ Na temui Dalila naxa gbelegbele, «Samison, Filisitakae bara fa i suxude!» Samison to xunu, a naxa a fala a yete бе, «N man xa mini yi fe kui alo boore biyaasi.» A mu a kolon Alatala nu bara a rabejin.

²¹ Filisitakae naxa a suxu, e a yae σοxо, e a xanin Gasa. Menni e naxa a xiri yolonxonyi

yoɔxui daaxi ra geeli kui, a xa nu se binyee mayindigilin, naxan sansi xɔri luxutama.

Samison xa faxe

²² Na waxati a xunsexe, naxan nu bixi, na naxa mini folo.

²³ Lɔxɔe nde Filisita mangɛe naxa e malan, e xa sɛrɛxe xungbe ba e xa kuye Dagon be ɲɛlexinyi kui. E naxa a fala, «Won ma ala bara Samison sa won sagoe!»

²⁴ Nama to Dagon to, e naxa a matɔxɔ, e fa a fala, «Won ma ala bara won yaxui sa won sagoe, naxan bara won ma bɔxi kana, a man bara won ma mixie faxa.»

²⁵ Na sɛɛwe kui, e naxa a fala, «Won xa Samison xili, won xa a mayele.» E naxa fa a ra kelife geeli kui, e a xiri e xa salide sanyie ra. E naxa a findi mayele se ra.

²⁶ Samison naxa a fala a rapɛrɛma be, «A lu n belexe xa sa salide sanyie ma, n xa n kilɔn e ra.»

²⁷ Xeme nun gine gbege nu na salide kui. Filisita mangɛe fan nu na. Na birin findi mixi wulu saxan nan na, e birin nu fa Samison mayele.

²⁸ Samison naxa Alatala maxandi, «N Marigi Alatala, i xa ratu n ma. N bara i mayandi, Ala, senbe fi n ma alako n xa n gbɛɲɔxɔ Filisitakae ma n yae xa fe ra.»

²⁹ Samison naxa a kilɔn na salide sanyie ra, keren na a yirefanyi ma, keren na a kɔɔla ma.

³⁰ Samison naxa a fala, «N xa faxa n nun Filisitakae ra.» A naxa salide sanyie tutun a senbe birin na. Salide naxa bira Filisitakae nun mangɛe ma, naxee nu na salide kui. Filisitaka

naxee faxa na fe kui, na konti dangi mixie ra Samison naxee faxa a xa dunijeigiri birin kui.

³¹ A xunyaе nun a baba xa denbaya birin naxa goro naa a fure tongode. E naxa a ragata Soraha nun Esetayoli tagi, a baba Manowa xa gaburi kui. Samison nu bara Isirayila yamari ꞑε mɔxɔꞑen beenu a xa faxa.

17

Ala maxandife Mike xa banxi kui

¹ Χεμε nde nu na Efirmi geyae fari naxan xili Mike.

² A naxa a fala a nga be, «I xa gbeti kilo fu nun keren a nun a tagi, naxan mupaxi i ma, a na n xɔnyi. N bara i xui me, i to nu na mupeti dankafe. N tan nan na tongoxi.» A nga naxa a fala, «Alatala xa n ma di baraka.»

³ A naxa yi gbeti kilo fu nun keren a nun kilo tagi so a nga yi ra. A nga fa a fala a be, «N tan yi gbeti fima Alatala nan ma. N a raxunuma ne, a xa findi kuye ra n ma di be. N fama yi gbeti ragbilende i ma na ki ne.»

⁴ A to gbeti so a nga yi ra, a nga naxa gbeti kilo firin nun a tagi so xabui yi ra. A naxa a raxunu, a a yailan kuye ra. E fa na ti Mike xa banxi kui.

⁵ Mike kuye batude nde soto na ki ne. A naxa serexedube xa dugi nun kuye gbeteе yailan. A naxa a xa di nde findi serexedube ra.

⁶ Na waxati kui, mangе yo mu nu na Isirayila. Kankan nu a waxɔnfe nan tun nabama.

⁷ Fonike nde nu na naxan kelixi Beteleemu Yudaya boxi ma. Lewi bɔnsɔe nan nu a ra.

⁸ Yi xeme naxa keli Beteleemu Yudaya boxi ma, a xa yire gbeta fen a sabatima dennaxe. A naxa jere han a Eframi geyae li, Mike xa banxi nu na dennaxe.

⁹ Mike naxa a maxorin, «I kelixi minden?» A naxa a yaabi, «Lewika nan n na. N kelixi Beteleemu Yudaya boxi nan ma. N na yire fenfe n sabatima dennaxe.»

¹⁰ Mike naxa a fala a be, «Won birin xa lu be. I xa findi n ma denbaya xa serexedube ra, n xaxili tima naxan na. N gbeti kilo firin fima i ma je keren kui, a nun sosee nun donsee.» Na Lewi bonsoe mixi naxa tin na ra,

¹¹ a xa lu Mike yire. Mike naxa meni a ma, a lu alo a xa di.

¹² Mike naxa a findi a xa serexedube ra, a fa lu a xa banxi kui.

¹³ Mike fa a fala, «Yakosi n bara a kolon Alatala fa fe fanyi rabama ne n be, barima Lewi bonsoe mixi nan na n ma serexedube ra.»

18

Danakaе sabatife Layisa

¹ Na waxati mange yo mu nu na Isirayila. Dana bonsoe fan nu na boxi fenfe e luma dennaxe, barima e mu nu ke sotoxi Isirayila bonsoe ya ma sinden.

² Danakaе naxa xeme gbangbalanyi mixi suuli mayegeti e bonsoe ya ma, naxee nu na Soraha nun Esetayoli. E naxa e xee, e xa Isirayila boxi raben. E naxa a fala xerae be, «Wo siga na boxi rabende.» E naxa Mike xa banxi li Eframi geyae ma. E naxa xi naa.

³ E nu na menni temui naxe, e naxa na fonike Lewika xui rakorosi. E naxa a maxorin, «Nde faxi i ra be? I munse rabafe yi yire? I na be munfe ra?»

⁴ A naxa e yaabi, «Mike bara fe fanyi raba n be, a wali sare fima n ma, n xa findi a xa serexedube ra.»

⁵ E naxa a fala a be, «Ala maxorin muxu be alako muxu xa no a kolonde xa muxu xa biyaasi sooneyama ne.»

⁶ Na serexedube naxa e yaabi, «Wo siga bojesa kui, barima wo nun Alatala birin nan a ra.»

⁷ Yi xeme suulie naxa siga, e so Layisa. E naxa a to, mennikae sabatixi bojesa kui, alo Sidonkae darixi a ra ki naxe. Si gbete yo mu nu na naxan e tooroma, xa na mu a ra e yamarima. E nu bara makuya Sidonkae ra, e mu lanyi yo xiri e nun bonsoe gbete tagi.

⁸ Yi xeme mixi suuli to gbilen Soraha nun Esetayoli, e ngaxakerenyie naxa e maxorin, «Wo munse toxi naa?»

⁹ E naxa e yaabi, «Wo keli, won xee. Won xa sa mennikae gere, barima boxi fanyi na e yi ra. Won xa won xulun. Won xa siga naa keren na, won xa na boxi soto!

¹⁰ Wo na so naa, wo a toma ne mennikae boje saxi lepu. Boxi belebele na e yi ra, Ala bara na sa wo belexe. Yire nan a ra, sese mu na yi dunja bende fuji fari naxan mu na na.»

¹¹ Dana bonsoe soori mixi keme senni naxa keli Soraha nun Esetayoli, geresose na e yi ra.

¹² E naxa te, e sa kuru Kiriyati Yeyarimi Yudaya boxi ma. Na nan a toxi, han to yire naxan

na Kiriyaŋi Yeyarimi xanbi ra, na xili falama Maxane Dana.

¹³ E naxa keli menni, e siga Efirami geyae yire, han Mike xa banxi nu na dennaxe.

¹⁴ Na temui yi xeme mixi suuli naxee siga Layisa boxi rabende, nee naxa a fala e ngaxakerenyie be, «Wo a kolon yi banxie kui serexedube kuntigi donma na na, a nun kuye masolixi, nun kuye naxan nafalaxi yoxui ra. Wo xa na birin mato.»

¹⁵ E naxa so na fonike Lewika xonyi, naxan nu na Mike xa banxi kui. E naxa a xebu.

¹⁶ Dana bonsoe soori mixi keme senni nu tixi naade ra, geresose na e yi ra.

¹⁷ Yi xeme suuli naxee siga boxi rabende, nee naxa so banxi kui, e naxa kuye masolixi tongo, a nun serexedube kuntigi xa donma, kuyee, nun na kuye naxan nu raxunuxi. Serexedube nu tixi banxi sode de ra, a nun yi soori mixi keme senni, e xa geresose suxuxi e yi.

¹⁸ E to ge kuye masolixi tongode Mike xa banxi kui, a nun serexedube kuntigi xa donma, kuyee, nun kuye naxan nu raxunuxi, serexedube naxa a fala e be, «Wo na munse rabafe?»

¹⁹ E naxa a yaabi, «Dundu, i naxa sese fala. I xa bira muxu foxo ra tun. I xa findi muxu xa serexedube ra, muxu xaxili tima naxan na. A lanma i xa findi serexedube ra mixi keren ma denbaya be, ka Isirayila bonsoe nde be?»

²⁰ Serexedube naxa seewa na woyenyi ra. A naxa serexedube kuntigi xa donma, kuyee, nun na kuye masolixi tongo, a naxa bira e foxo ra.

²¹ E naxa ti kira xon ma, dimee, xurusee, nun kote na e ya ra.

²² E to makuya Mike xa banxi ra, Mike dɔxɔbooree naxa e malan, e fa bira Dana xa die fɔxɔ ra.

²³ E naxa sɔnxɔe rate Dana xa die ma. Danakae naxa a fala Mike be, «Munse niyaxi? I wama gere sofe munfe ra?»

²⁴ A naxa e yaabi, «Wo bara n ma kuyee nun n ma sɛrɛxɛdubɛ xanin. Munse fa luma n yi? N wo gerema na nan ma.»

²⁵ Dana xa die naxa a fala a be, «I naxa sɔnxɔ muxu ra, xa na mu xeme ndee fama wo bɔnbɔde xɔnɛ ra. Na kui i fama ne gande i tan nun i xa denbaya ra.»

²⁶ E to na fala, e naxa siga. Mike naxa a kolon e sɛnbɛ gbo a be, na na a niya, a naxa gbilen a xɔnyi.

²⁷ E naxa Mike xa see nun a xa sɛrɛxɛdubɛ xanin Layisa. E naxa mennikae faxa santidɛgema ra, e na taa birin gan. Layisakae mu nu sese kolon barima e bɔpɛ nu saxi, yaxui yo mu nu na e yi ra.

²⁸ Mixi yo mu nɔ e ratangade, barima e nu makuya Sidɔn na, dari mu nu na e nun si gbɛtɛɛ tagi. E nu na geya bunyi Beti Rexobo biri. Dana xa die naxa gbilen Layisa taa ti ra a firin nde, e sabati naa.

²⁹ E naxa e baba Isirayilaka Dana xili sa na taa xun, naxan singe nu xili Layisa.

³⁰ Dana xa die naxa Mike xa kuye ti naa. Gerisomi xa di Yonatan, Munsa xa mamadi, naxa findi Dana bɔnsɔe xa sɛrɛxɛdubɛ ra, han e yaxuie e xanin pamane ma tɛmui naxe.

³¹ E nu Mike xa kuye nan batuma, Ala xa banxi nu na Silo waxati naxan ma.

19

Fe jaaxi Bunyamin boxi ma

¹ Mange yo mu nu na Isirayila boxi ma na temui. Lewika nde, naxan nu na Efirami geyae yire, naxa konyi gine nde fen Beteleemu Yudaya boxi ma.

² Kono na gine naxa yene raba, a keli a xa mōri xun ma, a siga Beteleemu Yudaya boxi ma a baba xonyi. A to kike naani raba naa,

³ a xa mōri naxa siga a yire alako e xa lan fe keren ma. A xa konyi fonike naxa a mati, e siga sofale firin fari. Na gine naxa a raso a baba xonyi. Na gine baba to na xeme to, a naxa a rasene seewe ra.

⁴ A bitanyi naxa a makankan, e fa lu a xonyi xi saxan. A naxa e yigiya a fanyi ra.

⁵ Xi naani nde, Lewika naxa kurun a xa kote yailan na, kono a bitanyi naxa a fala a be, «I de iba taami ra sinden, wo fa siga.»

⁶ E naxa dōxo, e naxa e dege yire keren. Na xanbi a bitanyi naxa a fala a be, «I xa xi be to koe ra. I xa tin na ra alako i bope xa rafan i ma.»

⁷ Na gine xa mōri naxa keli, a xa siga, kono a bitanyi naxa a karaxan a xa na koe radangi naa.

⁸ Xi suuli nde, a man naxa kurun, a xa siga. A bitanyi man naxa a fala a be, «N bara i mayandi, i xa i de iba sinden, i fa siga nunmare ra.» E man naxa e dege yire keren.

⁹ Na xeme to keli, a xa siga, a tan nun a xa gine, nun a xa fonike konyi, a bitanyi man naxa a mayandi, «I bara a to, koe na sofe. Wo xa xi be to, i bope xa rafan i ma. Tina wo xa kurun, wo xa siga wo xonyi.»

¹⁰ Na gine xa mōri mu tin na ra. A naxa keli, a nun a xa gine naxa dɔxɔ sofale firinyie fari, e siga Yebusu biri ra, naxan findixi Darisalamu ra.

¹¹ E makɔɔɛxi Yebusu ra temui naxe, nunmare nu bara so. Yi fonike konyi naxa a fala a marigi be, «Won xa ti be Yebusu taa kui, won xa xi be.»

¹² A marigi naxa a yaabi, «Won mu soma taa i si gbete sabatixi dennaxe. Won xa xi Isirayila taa nde ne Gibiya.»

¹³ A man naxa a fala a xa fonike konyi be, «Won xee, won xa so Gibiya, xa na mu Rama, won xa xi menni.»

¹⁴ E naxa jere han soge dula temui. E nu bara makɔɔɛ Gibiya ra, Bunyamin bɔnsɔe xa bɔxi ma.

¹⁵ E naxa so Gibiya, e xa xi naa. E naxa ti taa tagi, kɔnɔ mixi yo mu tin e yigiyade.

¹⁶ Fori nde, naxan keli Eframi geyae mabiri, kɔnɔ a nu sabatixi Gibiya ne, a naxa so taa kui nunmare, kelife walide xe ma. Menni mixie tan Bunyamin xa die nan nu e ra.

¹⁷ Na fori to xɔne to taa tagi, a naxa e maxɔrin, «Wo kelixi minden? Wo sigafe minden?»

¹⁸ E naxa a yaabi, «Muxu kelixi Beteeemu Yudaya bɔxi nan ma, muxu na sigafe Eframi geyae ma, n sabatixi dennaxe. N kelixi Beteeemu Yudaya bɔxi nan ma, n na sigafe Alatala xa banxi, kɔnɔ n mu yigiya sotoxi sinden.

¹⁹ Nooge nun burexe na muxu yi muxu xa sofale naxan donma. Taami nun weni fan na muxu yi muxu naxan donma, n tan, n ma gine, nun n ma fonike konyi. Sese mu luxi naxan mu na muxu yi ra.»

²⁰ Na fori naxa a fala a be, «Ala xa wo boje

sa. N bara wo yigiya, wo mu luma taa tagi to kɔɛ ra.»

²¹ A naxa e xanin a xa banxi kui, a ɲooɣe so sofalee yi. Biyaasilae to e sanyie maxa, e naxa e dɛge, e naxa e min.

²² E to nu na e dɛgefe, taa mixi rabɛɲinxie naxa fa, e naxa banxi bilin, e naade kɔnkɔn sɛnbɛ ra. E nu fa a fala fori bɛ, banxi kanyi, «Xɛmɛ naxan soxi i xa banxi kui, a ramini alako muxu xa yɛnɛ raba a ra.»

²³ Banxi kanyi naxa mini, a a fala e bɛ, «Ade, n ngaxakerenyie, wo naxa yi fe ɲaaxi raba n ma xɔɲɛ ra. N bara wo mayandi. Yi xɛmɛ bara so n xɔɲyi, wo naxa yi yunubi xɔɲxi raba a ra.

²⁴ N ma di ginɛdimɛdi nan yi ki, a nun yi xɛmɛ xa ginɛ, n xa nee ramini wo ma, wo xa wo waxɔɲfe raba e ra. Kɔɲɔ wo naxa na fe xɔɲxi mɔɔli raba yi xɛmɛ ra.»

²⁵ Yi xɛmɛɛ mu tin e tuli matide a ra. Na kui, xɛmɛ naxa a xa ginɛ suxu, a a ramini e ma tande. E naxa a kolon ginɛ ra, e fa a maxi na kɔɛ birin na han gɛɛsɛgɛ. Kuye to iba, e naxa a bɛɲin.

²⁶ Subaxɛ yi ginɛ naxa fa, a bira banxi dɛ ra, a xa mɔri yigiyaxi dɛnnaxɛ. A naxa lu naa han gɛɛsɛgɛ.

²⁷ Gɛɛsɛgɛ a xa mɔri naxa keli, a xa siga. A to naade rabi, a naxa a xa ginɛ to banxi sode dɛ ra, a bɛlɛxɛ saxi naade gonyi ma.

²⁸ A naxa a fala a xa ginɛ bɛ, «Won xɛɛ,» kɔɲɔ a mu a yaabi. A nu bara faxa. Na kui a naxa a sa a xa sofale fari, a siga a xɔɲyi.

²⁹ A to so a xɔɲyi, a naxa fine tongo, a naxa a xa ginɛ ibolon a salonsee ma dɔxɔ fu nun firin.

A naxa na xuntunyie rasanba Isirayila bõnsõе fu nun firinyie ma.

³⁰ Naxee birin na to, e naxa a fala, «Kafi Isirayilakae naxa keli Misira bõxi ma, han to, yi fe ñaaxi mooli mu nu raba sinden. Won xa lu yire keren, wo xa natε tongo yi xa fe ra.»

20

Isirayilakae nun Bunyamin bõnsõе gerefe

¹ Isirayilakae birin, fõlo Dana ma, sa dõxõ Beriseeba nun Galadi ra, e naxa e malan Ala ya i Misipa.

² Isirayila bõnsõее kuntigi birin nu na Ala xa ñama xa malanyi. Sõori wulu kemε naani nu na, e birin fata santidegema ra.

³ Bunyaminkae naxa a kolon Isirayilakae nu malanxi Misipa.

Isirayilakae naxa a fala na Lewika be a xa yi fe ñaaxi dentεge sa e be.

⁴ Na kui Lewika naxan ma ginε faxaxi, a naxa a masen e be, «Muxu nun n ma ginε naxa Gibiya li Bunyamin bõxi ma, muxu xa xi naa.

⁵ Gibiya xεmεe naxa keli n xili ma kõε ra. E naxa banxi bilin n nu na dennaxε, e xa n faxa. E naxa e waxõnfe raba n ma ginε ra han na faxa.

⁶ N naxa a fure ibolon bolon, n naxa a xuntunyie rasanba Isirayila bõnsõе birin ma, e xa a kolon yi fe ñaaxi naxan nabaxi Isirayila bõxi ma.

⁷ Yakõsi, Isirayilakae birin, wo xa wõyen, wo xa kiiti sa.»

⁸ Nama birin naxa lan a ma mixi yo naxa gbilen a xõnyi,

9 fo e xa mixie sugandi sinden naxee tema Gibiya xili ma.

10 E naxa a fala, «Xeme fu yo xeme fu, won xa keren xee a xa donse fen soorie be. Naxee luxi, e xa te Gibiya e xa wali jaaxi sare ragbilen mennikae ma, naxee bara fe xonxi raba Isirayila boxi ma.»

11 Na kui Isirayila xeme birin naxa e malan na taa xili ma.

12 Isirayila bonsore naxa xerae xee Bunyamin xabile birin ma, e xa e maxorin, «Yi fe jaaxi mooli dangixi wo tagi di?»

13 Wo xa na Gibiyaka mixi jaaxie so muxu yi ra, muxu xa e faxa alako yi yunubi xa ba Isirayila ma.» Bunyaminkae naxa tondi e ngaxakerenyi Isirayilakae xui suxude.

14 E naxa keli e xa taae kui, e fan xa malan Gibiya Isirayilakae gere.

15 Santidegema kanyi wulu moxonon nun senni nu na Bunyaminkae ya ma, nun Gibiyaka mixi keme solofere naxee sugandixi gere xili ma.

16 Soori yi matinxixi keme solofere nu na e ya ma, naxee fata geme wolide laati ra e koola belexe ra. E fata se birin gonode na ra.

17 Isirayilaka soorie santidegema kanyie nu lanxi xeme wulu keme naani bafe Bunyaminkae ra.

18 E naxa te Beteli, e Ala maxorin, «Nde singe tema muxu ya ma a xa Bunyaminkae gere?» Alatala naxa e yaabi, «Yudayakae singe xa na gere folo.»

19 Geesege, Isirayilakae naxa kuru Gibiya xili ma.

20 E naxa Bunyaminkae gere Gibiya ya tagi.

²¹ Bunyaminka naxee keli Gibiya, nee naxa Isirayilaka wulu mɔxɔŋɛn nun firin faxa.

²² Na dangi xanbi, Isirayilakae naxa limaniya, e man naxa te Bunyaminkae xili ma, e nu na dennaxe na ɔxɔɛ singe.

²³ E man naxa te Beteli, e naxa wa han nunmare, e fa Alatala maxɔrin, «A lanma muxu man xa Bunyaminkae gere, muxu ngaxakerenyie?» Alatala naxa e yaabi, «Wo e gere.»

²⁴ Awa na xi firin nde, Isirayilakae man naxa te Bunyamin xa die xili ma.

²⁵ Na ɔxɔɛ Bunyaminka naxee keli Gibiya naxa Isirayila xeme wulu fu nun solomasaxan faxa santidegema ra.

²⁶ Na temui Isirayilakae birin naxa te Beteli, e naxa wa Alatala ya i. E naxa sunyi suxu han nunmare, e serexe gan daaxi nun xanunteya serexe ba Alatala be.

²⁷ E naxa Alatala xa marasi fen. Na waxati Ala xa saate kankira nu na Beteli.

²⁸ Finexasi, Eleyasari xa di, Haruna xa mamedi, nu a jengi saxi na birin xɔn ma. E naxa Ala maxɔrin, «A lanma muxu man xa te Bunyaminkae xili ma, muxu ngaxakerenyie, ka a lanma muxu xa gere lu naa?» Alatala naxa e yaabi, «Wo man xa gere so. Tina n e sama wo sagoe.»

²⁹ Na temui Isirayilakae naxa Gibiya melen.

³⁰ E to te Bunyaminkae xili ma Gibiya ya tagi e nu na dennaxe boore biyaasi,

³¹ Bunyamin xa die naxa mini e gerede. E naxa mixi tongo saxan faxa Beteli nun Gibiya kirae xɔn ma.

³² Bunyaminkae naxa a fala e booree be, «Won man na e bonbofe ne yi ki alo a singe,» kono Isirayilakae tan nu bara a fala e boore be, «Won xa won makuya taa ra, e xa bira won foxo ra kirae xon ma.»

³³ Isirayila xeme naxa e malan Bali Tamari. Naxee nu na Gibiya melenfe, nee fan naxa mini kene ma.

³⁴ Isirayila soori fanyi wulu fu naxa Gibiya gere a paaxi ra. Bunyaminkae mu gexi a kolonde gbaloe nu bara e li.

³⁵ Alatala naxa Bunyamin bonsoe bonbo Isirayila ya xori. Xeme santidegema kanyi wulu moxoren nun suuli, xeme keme naxa faxa na loxo.

³⁶ Bunyamin xa die naxa a kolon e mu geenixi yi biyaasi. Isirayilakae naxa a lu e xa gbilen Gibiya mabiri, barima e a kolon soori gbete nu na e melenfe.

³⁷ Soori naxee nu Gibiya melenfe, nee naxa so taa kui keren na, e mixi birin faxa santidegema ra.

³⁸ E nu bara lan a ma e xa te so taa ra, tuuri gbegbe xa te koore ma.

³⁹ Isirayilaka booree to na to, e naxa e mafindi Bunyaminkae xili ma. Bunyaminkae to bara mixi tongo saxan faxa, e naxa a fala e boore be, «Won na e bonbofe ne yi ki alo a singe.»

⁴⁰ Kono e to tuuri to te ra koore ma kelife e xa taa kui,

⁴¹ Bunyaminkae naxa gaaxu na gbaloe ya ra. Isirayilakae naxa e mafindi, e xa e gere.

⁴² Bunyaminkae naxa gbilen e foxo ra, e e gi gbengberen kira xon ma. Soori naxee nu na taa

kui, nee mu tin e xa e ba e yi. E naxa bira e fɔxɔ ra, e e faxa, barima e nu bara makɔre e ra.

⁴³ Isirayilakae naxa e rabilin, e bira e fɔxɔ ra Gibiya fuge ra.

⁴⁴ Bunyamin sɔɔri fanyi wulu fu nun solo-masaxan naxa faxa na gere kui.

⁴⁵ Xeme wulu suuli naxa faxa, naxee nu bara e gi gbengberen kira xɔn ma, sigafe ra Rimɔn geya mabiri. Xeme wulu firin naxa faxa, naxee nu bara e gi han Gidomi.

⁴⁶ Na lɔxɔe Bunyamin sɔɔri fanyi wulu mɔxɔɔɛn nun suuli naxa faxa, e birin santidegema kanyi.

⁴⁷ Xeme keme senni, naxee nu bara e gi gbengberenyi Rimɔn geya mabiri, naxa lu menni kike naani.

⁴⁸ Isirayilakae naxa bira Bunyamin xa die fɔxɔ ra e xa taa birin kui. E naxa e faxa santidegema ra, xeme nun xurusee. E naxa te fan so e xa taa birin na.

21

Bunyamin bɔnsɔe xa gine sɔtɔe

¹ Isirayila xeme nu bara e yete rakali Misipa, a falafe ra, «Mixi yo naxa a xa di gine fi Bunyaminka nde ma.»

² Nama naxa siga Beteli, e naxa lu Ala ya i han nunmare. E naxa wa e xui itexi ra.

³ E nu fa a fala, «Isirayila Marigi Alatala bɔnsɔe nde baxi muxu ra munfe ra?»

⁴ Na kuye iba, e naxa keli subaxe ma, e serexebade yailan, e fa serexe gan daaxi nun xanunteya serexe ba Ala be.

⁵ Isirayilakae naxa a maxorin, «Xabile mundun mu na won ya ma to naxan mu faxi Alatala xa malanyi?» E nu bara e rakali mixi xili ma naxan mu fama Alatala xa malanyi Misipa. E nu bara a fala na kanyi xa faxesa.

⁶ Isirayilakae naxa kinikini e ngaxakerenyi Bunyaminkae ma, e nu fa a fala, «To loxoe bonsoe keren bara ba Isirayila ra.

⁷ Won munse rabama e be alako e xa ginsee soto, barima won tan bara won kali Alatala ra, won mu won ma di ginsee fima e ma?»

⁸ Na kui, e naxa a fala, «Xabile nde na Isirayila bonsoe ya ma naxan mu te Alatala yire Misipa?» E naxa a mato fa Yabesi Galadi mixi yo mu nu na e ya ma.

⁹ E to pama mato, e naxa a kolon Yabesi Galadi xabile mu nu na e ya ma.

¹⁰ Nama naxa soori wulu fu nun firin xee Yabesi Galadi e xa mixi birin, ginsee nun dimedie, faxesa santidegema ra.

¹¹ «Wo lan ne wo xa menni xeme birin faxesa. Wo man xa ginsee faxesa naxee mu findixi ginemedi ra.»

¹² E naxa ginemedi keme naani li Yabesi Galadi, naxee mu xeme fe kolon. E naxa e xanin Silo Kanaan boxi ma.

¹³ Nama birin naxa xerae xee Bunyamin xa die xon ma naxee nu na Rimon geya mabiri. E naxa lanyi woyenyi masen e be.

¹⁴ Na temui Bunyaminkae naxa gbilen Isirayila boxi ma. Isirayilakae naxa Yabesi Galadi ginsee so e yi ra, konon e birin mu ginsee soto.

15 Nama naxa kinikini e ma, barima Alatala nu bara a ragiri nde xa ba Isirayila bõnsõe ra.

16 Forie naxa a fala, «Won munse rabama e be alako naxee mu ginε sõtɔ, e fan xa ginε ndee dɔxɔ? Bunyaminka ginε birin bara faxa.

17 A lanma e xa ke tongoe sõtɔ, alako bõnsõe nde naxa ba Isirayila ya ma.

18 Kõnɔ won mu nõma won ma die sode e yi ra, barima won bara won nakali, «Mixi naxan a xa di ginε fima Bunyaminka nde ma, na kanyi xa danka.»

19 «Awa, won naxan nabama, na nan yi ki. Ne yo ne sali nde rabama Silo, Beteli kɔɔla ma, Beteli nun Sikemi kira fuge ra, Lebona yirefanyi ma.»

20 E naxa a fala Bunyaminkae be, «Wo siga, wo sa wo nõxun weni bilie xɔɔra.

21 Silo ginεe na mini fare boronde, wo xa mini weni bilie xɔɔra, wo xa Silo ginε ndee tongo wo yete be, wo man xa gbilen Bunyamin bɔxi ma.

22 Xa e baba, xa na mu a ra e taarae, fa wo kalamude muxu xɔn, muxu a falama ne e be, «Wo xa dije e ma muxu xa fe ra, barima muxu mu ginε sõtɔxi e xa sɔɔri birin be. Wo tan xa mu wo xa die fixi e ma. Na kui wo mu na marakali kanaxi.»

23 Bunyamin xa die naxa na birin naba. E naxa ginε tongo e xa kɔnti ma ginεe ya ma, naxee nu na fare boronfe. E naxa e xanin e xa bɔxi ma, e man naxa e xa taae ti, e sabati naa.

24 Isirayilakae fan naxa gbilen e xɔnyi, e bõnsõe nun xabile nu na bɔxi naxan ma.

25 Na waxati mange yo mu nu na Isirayila. Kankan nu a waxɔnfe nan nabama.

Soso Kitaabuie: Tawureta, Yabura, Inyila
The Holy Bible in the Susu language of Guinea (Soso
Kitaabuie: Tawureta, Yabura, Inyila Bible)

copyright © 2015 Mission Évangélique Réformée Néerlandaise et les
Traducteurs Pionniers de la Bible

Language: Susu

Contributor: Mission Évangélique Réformée Néerlandaise

This translation is made available to you under the terms of the Creative
Commons Attribution-Noncommercial-No Derivatives license 4.0.

You may share and redistribute this Bible translation or extracts from it
in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.
Pictures included with Scriptures and other documents on this site are
licensed just for use with those Scriptures and documents. For other uses,
please contact the respective copyright owners.

2020-11-11

PDF generated using Haiola and XeLaTeX on 18 Apr 2025 from source
files dated 29 Jan 2022

f1d08866-ea3e-5b9b-b506-e7690c5c61d2